


夏峯先生集

二





夏峯先生集

(二)

孫奇逢著

# 夏峯先生集卷三

序

## 送徐恆山轉山海理餉序

重品格者。必觀其所不取。急幹濟者。須視其所有爲。兩者不可偏廢。而兼擅者。實難其人。世豈無皎焉自好者。然默體其行徑。細按其肺肝。非前有所慕於進。則後有所懼於罪。幸而恆處於有可慕。有可懼之地。則可以終其身。而不至於壞。倘可慕者。既已得之。則無復有懼於罪。或可慕者。既已絕望。又將甘心冒罪。而不辭。人見其然。則曰。若人也。而今乃若是。不知始終。固此一人也。徐使君治容治玉。廉者讓其守。才者遜其爲。兩地之祠而祝之者。固煇煇在人口頰也。今之治。易守益峻。而爲益奇。熊經略再起。田間採有司賢者。一人以治軍儲。而主爵者。以使君往也。豈偶然乎。姑舉其一二大端。可以濟時艱。而紓國難者。如以二千金抵加派。胸中已不見有可欲矣。源頭一清。作用自快。如辨假印於微茫疑似之間。挽逃軍於搶攘急迫之際。總之人所束手之題。使君曲爲條指。人所歇腳之事。使君偏爲熱腸。一無所慕。一無所懼。明自廉生爲從守。見經略雄心冷眼。急思一當。而獨有取於使君也。意在斯乎。慨自遼瀋陷沒。舉國張皇。議守議戰。幾無遺策矣。夫不守廣甯。京師未易守也。不復河東。廣甯不可守也。此理之易見。而計之蚤決者。然

審機觀變。其妙用在經撫之匠心。後勁前茅。其實際在兵將之湊手。使君坐擁關門。經理糧餉。則又經撫之血脈。而軍士之咽喉。其所仔肩。又何如耶。使君行矣。廟社生靈。實深倚借。吾知所慕者。定不猶夫人之慕。所懼者。定不猶夫人之懼也。自今以往。將可慕者得。而可懼者去。天下後世皆信之曰。使君果非慕與懼者也。然則知使君者。固莫如余矣。

贈張于度序

今上御極之元年辛酉。以覃恩選士于度。魁梧磊落。俊偉多奇。余知之。人亦知之。其爲文峻整英挺。千人自廢。余知之。人亦知之。然此未足多也。于度弱冠失怙。伊時學尙未成。焚焚一藐。孤侍孀母。撫三弱弟。一女弟。而家且蕭然。無雒陽附郭之半。卽仰事俯育。最易束豪傑之手。于度拮据辦理。十餘年來。成婚成嫁。填饒和而琴瑟調。所以貽高堂之順。慰九泉之心者。于度無愧也。人皆知于度家庭中無間言。抑知時勢艱難之會。非真正英雄。而骨肉天性之間。不知幾多戈矛之象。從來庸德難能。必身試之。而後知其難耳。且于度舉止開展。志向敏達。無世人齷齪之態。更無世人誕慢之習。以故眉宇常舒。胸次常坦。議論多簡當。而不詭於正人。或多于度生來之骨相。而不知于度閱歷之深心。取友一道。余更爲于度喜。楚館秦樓。無于度之迹也。飲博懽呼。無于度之迹也。少年結客。豪俠自負。無于度之迹也。于度當失怙時。卽奉父遺命。同余野處者三年。繼而從伯順遊。後神京飛越。所交者皆四方知名士。間有一二貴族世家。虛館席而飾賓筵。于度夷然不屑。余知于度之學有所得。非僅僅一榮身肥家而已。浮邱左使君之

言曰。張生文能獨造。貌亦異常人。深爲新天子得人慶。是役也。富貴功名。于度所自有。然余知于度。非但富貴功名中人也。

贈魏慶堂序

坡公曰。仁者必有後。知言哉。雖古人興亡成敗之數。令人若信若疑。乃詩書所記載。彰彰可考。不於其身。於其子孫。此王晉公所以修德於身。責報於天。取必於數十年之後。如持左券也。慶堂父秋亭公。爲余岳翁。所謂立誠敦信。先行後言之君子也。懿美固在人口。乃壽不滿德。竟以一博士員終其身。且數十年來。寂若無人。而家且益落。浮薄無根者。往往取青拖紫。釣名先世。藉口餘牀。不幾令善者怠。惡者肆乎。噫。此未深於德之說也。君子之道。闡然日章。小人之道。的然日亡。聲名著矣。而其人非。則其斷絕先世之脈者。必此人也。聲名隱矣。而其人。是則其縣互先世之脈者。必此人也。慶堂固雅意先志。肯構肯堂。其器宇凝然。望之知爲承家之令子。非所謂其人存者與。存其人。則貧窶可也。富厚可也。卑賤可也。榮貴可也。總之不忝於先世。而無愧於爲人。況乎津津秀發。代耕有祿。則是槐氏之德。尙未艾也。陽明子曰。志不立。天下無可成之事。雖百工技藝。未有不本於志者。今慶堂恢張先德。志聖則聖。志賢則賢。志不立。如無舵之舟。無銜之馬。漂蕩奔逸。終亦何所底乎。則承先志者。信不獨在功名也。倘身名赫耀。而一切所爲。俱與先世反。先世以孝友。而我轉悖逆。先世以忠實。而我轉機械。先世以寬仁。而我轉急促。則先世其肯曰。我有子而能大我之後乎。余於岳翁。知嚮往。故今日以承先志立己志。爲區區贈遺之私。想慶堂必不并髦於斯。

語。

贈李心陽序

天地間有其名甚美其味甚長人人涉之人人爭欲去之卽人人去之人人復欲襲之者果何物也余爲質言之曰貧也日用徵逐之人此無足論試執學道之人而問曰爾不欲富乎彼卽勉爲承當而一念憤不能平之意未有不恨時之乖而怨命之舛者蓋其趣不見咀之無味遂自苦耳迨一旦取青拖紫凡可以解吾之貧者不遺餘力而有人焉從旁問之曰爾欲富乎彼必有慚於面而阻於口避之若仇而惡之若染者蓋其名芳而欲借以爲託處耳有所爲勉承而非其心之所甘則是小人之所喻者而陰以爲就也有所爲託處而非其意之所恬則是君子之所喻者而明以自寬也此學道之人所以鮮底於成而疏水曲肱簞瓢陋巷之家法遂寥寥絕響矣余友李子心陽所稱學道人也其先世乃吾容之富室及心陽之身家不撐半椽力不庇八口無時不悲暑雨也無時不歎祁寒也旁觀者實抱不堪之憂而心陽當之淡如也且其眼底最曠其肝腸最熱其舉止最豪俠而無跼踖之色凡交知者無不敬而愛之且憐之思所以計永賴者無絲也今且食廩於庠矣恆產恆心兩有所藉矣試思平生來所茹苦之歲月果若仇若染迫於不得不遭之勢耶抑有甚美甚長者隱隱躍躍恍露一綫於其際耶等此歲月耳濃華者日與小人共域於所喻之中而彼不悟也一悟焉有廢然而返耳淡泊者日與君子共喻於所喻之中而彼亦不悟也一悟焉則當下而足耳此非道之富貴斷無可處而非道之貧賤未敢輕議去也余願心陽毋虛度

所遭之境。而尋孔顏之所樂者何在。更無願心。陽異時榮華。與此道漸遠。而猶襲此口脰也。同窗知契。無物可贈。聊共闡此貧字之義。

贈王紫垣序

抗疏明廷。易論交世路難。此周蓼洲語也。每相會輒誦之意。若有深慨焉。伯順亦云。人情閱盡。見交難。二君子肝膽照人。海內聲氣。踵踵相接。何獨於交道而難之。若幾經翻覆者之賣弄。忽而發此深省也者。噫。心洞肝相。骨肉相親。期於無斃。指未敢多屈也。若慷慨擊筑。直任初心。不願衆口。真古燕趙悲歌面目。患難死生。不相背負者。庶幾乎冀一遇焉。而未得其人。益信蓼洲伯順之語。非欺我也。紫垣與余。生同里。然寄迹燕市久。習俗之移。亦不敢爲賢者諱。然窺其胸中。有許多欲做而未即得做之事。其喉間有許多欲語而莫可告語之處。時而觸景興懷。借他人之酒杯。澆自己之壘塊。訴心中之不平。感數奇於千載。人多目爲狂。爲不諳事。余每歎曰。此蓋有心人也。追風逐電。決不在於牝牡驪黃。聲應氣求。豈可得之尋行數墨。殆余所謂直任初心。不願衆口。真古燕趙悲歌其人乎。紫垣每相過。酒後耳熱。輒謂余曰。丈夫之生也。必有所爲。若必蠢蠢然如醉如夢。流連花酒之間。徘徊妻孥之側。此庸夫俗子之所習慣。不甘心矣。其俠腸義骨。傾洩無餘。以此人而效用於知己。患難死生。豈有相背負者哉。人以爲狂也。余謂非狂。無此勁骨也。人以爲不諳事也。余謂諳事。則多展轉避就。雨覆雲翻矣。伯順一日晤紫垣於燕市。亦以余爲知言。

紫垣族人久爲貼軍所苦。目擊傷之。願出地數畝。代族人幫貼。且於清明祭掃。捐資糾衆。得萃渙合離之意焉。是役也。俱不足爲仗義者難。但紫垣亦寒士耳。首爲此舉。以視世之智盡能索。競刀錐之末者。何如耶。大中見小。小中見大。今古豪傑。大抵皆然。紫垣而好行其德也。其族人遂欲急稱其德。索余言以遺之。

賀梁如星侍御序

余友如星梁公。偉貌通才。三任爲令。風清弊絕。其於治也卓矣。報績奏最。徵拜爲御史。需命未幾。邑之搢紳學士。辱公之知。慶公之遇。屬文於不佞。稱觴爲賀。余曰。賀不在公。僉曰。何居。余曰。海內凋敝已久。今秋禾千里若焚。盡所得不足償官稅。飛蝗蔽天。飢民徧野。誰爲繪圖九重者。公可以直達宸聰矣。敢爲蒼生賀。天子冲齡踐阼。雨露雷霆之用。豈遂無溢喜溢怒於其間。補袞有人。則激濁揚清。獻可替否。非所謂以臣直而弼主聖者與。敢爲主德賀。東西蠢動以來。斃鋒鏑而損疆土。此不必問。獨大臣纍纍被逮被勦。其束手而仰鼻息於朝議。固籌邊者不足有爲。至鬪口而置成敗於邊人。亦建言者盡成築舍耳。公慨然主持於內。則東西其有濟乎。敢爲封疆賀。人才消長。係國運盛衰。今雍容廊廟者。自不乏泉鑿之選。然緹騎星馳。削爵貶秩之命。日下甚至繫獄中而斃杖下者。踵相接也。遊魂羈士。孰非祖宗培植之氣類乎。維持調護。仰賴公等不淺。敢爲人才賀。四者皆關於臺諫。余固不爲公得侍御賀。而實爲侍御得公賀也。時張君星所在坐。顧謂余曰。子以四者備責侍御。誠重之矣。抑知今日之體。視昔稍輕。昔神廟時。臺不數人。而人兼數事。凡有論列。用固用矣。卽有不用。數十年之後。猶陰行其言。今臺諫之職。艱於就而易於去。倘於



四者或亦有不得行其志者乎。余曰：否。官非能重人，惟人能重官耳。今之自謂不能行者，皆其不欲行者也。皆其趨避心切，通塞念異，不能重官以重人者也。夫官有一時之官，有百世之官，人有易盡之人，有不朽之人，與時俯仰，隨波上下，何難好官？我爲但恐其官易盡耳。官盡而人之盡也久矣。蓋官等耳，而所司異，宰相行其事者也，臺諫行其言者也，事猶有格而不得行之，會言則無闕而不得言之時，言行而志已行矣，言或有時不行，而所言之理已獨行於天地古今之間。夫孰得而壅之哉？公茹苦食淡，垂四十年，居平二三兄弟，所講求於寤寐誦讀之際者，蓋亦有日。今登第入仕，復十餘年，三令巖邑，儼然繡衣，茹苦食淡，未嘗一日易也。舉所爲行，已臨民，與素所講求於寤寐誦讀者，亦毫無易也。非古所稱不變塞，其人與人之言曰：士之志道者十，而體道者百，而一體道者十，而不變塞者百，而一蓋體道者，譬涉溟渤，期於必濟，而不變塞者，雖勞筋苦骨，風濤毒霧，志不少悔。余以公之不變塞者，知其必能格君，致身重官，以重人。舉四者所仰望，而不卽得者，公必一一有以答天下之望也。自秀才而繡衣，所入之途，不知幾易，其茹苦食淡如故也。自繡衣而三公，所入之途，又不知幾易，其甘苦濃淡之境味，豈遂有以易其心耶？況中州東魯之墟，士民被服明德最深，且古來固多以循吏而爲名臣，然亦有功名損於治郡時者，人謂有初，卽以有終。余謂持末難於持始，公將以直諫高天下，諒於布素之交，不督過其語言之無當也。星所亦曰：古人之誼，每不以頌而以規，是可以滿酌侍御之堂矣。

蓬萊令牛公誌狀序

士而非特立獨行也。無足爲士。士而果特立獨行也。又岌岌乎爲士矣。何也。流俗之權太重。一切俗事俗情。我日應緣於其中。則俗人俗眼。便與之相安。稍稍厭薄此態。而挺然有拔俗之意。且羣起而指之爲不諳事。不近情。又相與排斥詆觸之。先儒有云。非高著眼。覷破流俗。抵當不住。此特立獨行之所以難也。年友牛公羽。泗言不傍人口。脰行不循人轍迹。神厲志凌。以千古自命。然居鄉居官時。有所不理於口者。總之孤行一路。舉俗所爭趨之事。俗所共熱之情。而掉頭欲避。至意之所是。見之所到。挺身與之。不顧毀譽。殆所稱特立獨行者其人耶。然而已矣。嚶鳴同響之情。存亡異路之悲心。且怦怦動矣。猶憶甲辰。余兩人商略文事時。而品鹭古今。公於吾黨二三兄弟。互用激揚。寥寥片語。深中隱微。惜未竟其才。故人亦莫窺其藩。始信英雄未遇。不獨名湮滅而不聞。且以其身當毀譽。是非之衝。而受顛倒於世。向使公肯小抑其獨行之意。則居官時。當不至拂逆上官。而所入亦何至於落落。雖然。此正特立者。獨標面目於兩間。決不肯向流俗毀譽中討活計也。余當時亦妄有所期許。今頭顱如許。意氣都盡。仰面看屋梁。作老書生酸腐語。回首少年。不免失笑。白沙先生之言曰。白頭孤負垂髫志。猶憶城南就館時。三復斯語。不勝徬徨。公生平有王觀察爲之誌。陳孝廉爲之狀。後一年元配陰孺人逝。郎君輩痛母益痛父。日月幾何。竭蹶襄兩尊人窀穸事。不必峽猿三聲。而腸且寸斷也。形骸有盡。長年住世者。獨此一段精神。稱不朽。唯精與神。亦非語言文字所能傳。後有知公者。當於其特立獨行處得之。思過半矣。

魏義士者。生於勝國之季。迄今逾三百年。眉宇精神。宛然如在。因而感於立言之業。比於功德。信不誣也。義士世居容城之沙河村。其慷慨好施。初於郡誌中領其概。後父老年長者。間能道公還田事。然事蹟恍惚。子孫喬野。其人亦在稀微縹緲之間。一日余從姪高雅。忽出一殘卷。示余曰。其妻黨魏義士還田卷也。余挑燈披閱。義士慷慨好施之概。宛逗鬚眉。色笑於殘編斷簡中。共計所還田十餘頃。撒數總數。本末註記甚詳。一時聞人達士。咏歌記敘之文。已久飽蠹魚之腹。所僅存者。危學士素暨其子一二段耳。其曾孫壻王公敏。再爲表揚。則義士之德輝。并傳義士者之精氣。俱可得於意言之表矣。卷存而義士之功德與俱存。誰謂立言非不朽盛事哉。按敏爲此卷。在永樂五年丁亥。卷中吳勉之長歌。在洪武己酉。危學士父子序記。已失年月。獨載避兵事。在至正戊戌。則距今且三百年矣。夫還田事。至永樂五年。大要四五十年間。而碑已稱殘。卷已稱廢。自永樂五年後。二百四十一年。殘者雖泯。廢者猶存。使後死者。猶得弔殘而續廢。非鬼神呵護不至此。嗚呼。亦云艱矣。得之既艱。可令其失之容易。余友崔西星。與義士同里。余曰。若知爾鄉之興讓乎。夫鄉以義士得名。則義士當與此鄉不老。凡生於其地。而入於其里者。當不知如何去其競心矣。西星慨然爲新其卷。而囑余引其端。聞之義士。久從祀鄉賢。不知何時。有等作喜戚。任好惡之人。謂生前無爵位。遂潛去其主。侵淫既久。徵實無人。而祠中竟失義士之座。噫嘻。鄉賢而論爵祿也。顏閔一流。烏得窺俎豆末光耶。吾容彈丸地。賢豪接踵。靜修忠愍而外。張處士希古。人皆能道之。不知義士固開山導師也。

鹿太公舉元孫序

辛未九月念六日。封太常少卿鹿太公會孫靜觀。舉子稱觴者。冠履闐門。各致其喜劇之辭。有曰。靜觀年十六。先舉得雄。且適當論秀時。此吉祥善事也。宜賀。有曰。仁卿以海內名士。年未四十。而卽抱孫。宜賀。有曰。伯順以社稷臣。暫請休沐。左提孫。右挈曾。戲綵靈椿膝下。宜賀。有曰。太公年逾古稀。饜饠善飯。擁子孫。會元於一堂。宜賀。羣而質之孫子。孫子曰。分享之。皆足爲一人之福。合享之。則天地間之奇福也。太公又合子孫曾元之福。而彙爲一人之福。更奇之奇也。就耳目睹記。五世一堂。間亦有之。或逮萱不逮椿。或備蘭未備桂。卽庶幾逮且備矣。然不事詩書。未免有兪父氣。事詩書矣。使不敦品行。猶華士之淺淺者耳。若五世而多貴顯。五世而皆賢詰。則天地間一人也。太公爲名侍御。豫軒先生子。復以伯順貴。歷封至太常。是世俗所侈然鳴得意者。而以觀太公。不能辨其爲某人子某人父也。自弱冠秉家政。未明而起。入夜而不息。內外食指數十。無不待命於太公之一身。五十餘年如一日。且以七十老人。色養萱堂。不減孺慕。於弟若姪。體恤周至。惟其意之所欲。而毫而幾微相拂。至故舊窮親。一言相諾。則舉家瞻養。子擇配。女擇嫁。終身無倦色。至於利害所係。如左。魏諸君子之事。誰敢過而問者。太公毅然任之。蓋不得意於世人之所趨。故不灰心於世人之所避耳。總之於天地間。另開眼界。自具肝腸。鍾東海西山之靈秀。於江村一片地。故以五世發名教之光。一堂潤人倫之色。豈偶然哉。龐公徐孺子。一匹夫耳。百世下。聞其履行。見其山川廬舍。歎歔瞻戀。則今日之江村。千載下。當有繪圖賦詩於稀微縹渺彷彿疑似之間。可令躬逢其盛者。直

等爲日用居室之常也哉。余不肖。一年強半。寄迹江村。考德伯順談藝。仁卿時奉太公手談。見靜觀諸弟。嬉繞杖履間。探菓之餘。誦古詩琅琅也。四世之慶。咸以五世期之。而今果然矣。人之言曰。爲賢者後。難乎肖矣。爲聖者後。愈難乎肖矣。鹿門自侍御封翁多碩德。鄉人士至今談其遺事。如睹古初。則太公之懿行。醅修伯順之清忠亮節。亦祇謂之無愧於祖父。倘曾元而後。稍弛身範。便損家聲。則爲賢者後。不更難哉。雖然。難在此。易亦在此。知其難而易者。至矣。請以質之太公。當必以余爲知言。

### 送韓參夫南遊序

古稱黯然銷魂者。唯別而已。此語初未之信。蓋交不越數舍。違不喻數旬。卽有以歲月計者。明知其地。知其人。山陰之興。可以朝發夕至。故離別之感。未有甚焉。後寓都門七年。而鄉之朝夕與處者。遠且疎矣。離別之情。始怛怛動也。迄自都旋里。而都之數載與遊者。又遠且疎矣。離別之感。益怛怛動也。曾記出都時。李孟超來晤。執手相別。兩情欲斷。爲賦長歌。幾不成讀。平時飲興飛揚。此未及三爵。則已醺然矣。蓋有所甚傷焉者。故不覺其蕭瑟至此。自是以往。未及與人相會。便苦與人相別。庚午春。參夫攜其子昌過我。驚喜交集。蓋十二年前都門訂交而別焉者也。留草堂數日。臨別之際。卽訂後期。嗣是頻相過。頻相留。皆有以匡我不逮。今歲余下第歸。方卜期視家弟於武城。忽參夫復攜其子昌至。益驚且喜。因向來祇知其南遊。不意其尙自北來也。武城爲南行便路。雖以病困支離。評騭古今。商榷性命。益發我二十年來未及見。未及聞。無何將戒裝別去。黯然神傷。幾蹈往年與孟超河梁執手情況。繼而思之人。非麋鹿。豈能常聚。且

見囿一隅。識限一方。不幾令司馬太史笑人哉。竊歎余徘徊顧盼。不能勇於出門。且將望參夫足迹徧天下。識盡世間異人。閱盡世間佳山水。以廣吾聲氣。拓吾襟期。又何眷戀於臨岐。愴懷於分袂乎。因相與劇談雄飲。大笑出門。歌太白我執爾手。爾達我情之句以送之。且恨相知者。不再有參夫輩數人。爲東西南北之遊也。此果我輩之不及情乎。抑有餘情乎。請以質之南國諸君子。

贈楊郎念祖序

聞之王謝子弟。他氏不敢輕與之議。婚論交。蓋門庭清貴。舉世所宗。又如唐世族。志雅重士。流爲天下榮。則祖德之爲後人倚庇也。從古然矣。然奪爲後人者。能世其德。冷然於世。故物情之外。提維風易俗之權。則賢子弟之撐持世運。爲士人留羞惡一脈。而判清濁之途。其關係原非淺鮮。紀僧真請於其主曰。臣叨榮至此。無所復須。惟乞作士大夫。其主不自命。使詣江謝。紀甫登榻。江已移牀。曉然曰。士大夫固非天子所命。乃知天子之權。能使貧者立富。賤者立貴。市井宦寺立躋。公卿而踞台鼎。而獨不能使不士者爲士。至今讀移吾牀遠客一語。真是壁立千尋。鳳翔萬仞耳。吾容忠愍先生。爲海內人倫冠冕。而玉川父子。俱能世其德。遞衍於不墜。余習其人久。見其不激不隨。貧而無憾。色剛而無猛氣。鹿伯順嘗稱無愧名家子。其長郎念祖。恂雅飭逼肖其父。一日造廬請曰。蓬門之子。稍能自暨。便有光前世。余小子不敏。叨爲賢者後。如何能無殞厥門。以自免於墮落。余爲之懷然曰。此固忠愍之靈也。閎閎之家。難於單寒。蓋爲無志者立論。今子之志。懼貽羞於先人。則無論異日。所以光大前人者何在。卽此一段清素恬雅。勉勉自修之。

虛懷。恐王謝子弟不敢雁行。所稱爲士之清流者。非耶。清自與濁遠。舉世一切濁言。自不入于耳。濁行自不措於躬。濁念自不萌於心。清濁之介。旣分。將是非自判。好惡自眞。法戒自嚴。此之謂脫凡入聖。離昏入昭。凡窮達得喪榮辱喜戚。何者足點吾清虛之府哉。試觀君家忠愍。到頭忠烈。始於早歲艱辛。不歷困窮拂逆之境。則其肩大任重也。必不墜。則武侯淡薄。明志一語。眞士流之指南也。本來面目。頻頻照。恐落寰中第二人。此君家家訓。伯順字以念祖。意在斯乎。

### 古人交序

余讀古人交。未嘗不掩卷歎息。而重有感於今之交也。權之所在。雖疎必重。勢之所去。雖親必輕。甚有肝膽與共。死生相期。而意忤言簡。凶終隙末。眞有如昌黎所云。臨小利害。僅如毛髮。比轉眼若不相識。且擠之而下石焉者。此范子箕生所爲。箋古人交也。箕生意豪氣上。生平所與交者。石卿鄴若數君子耳。然交惟不濫交。乃終合。古人所謂情好日密者。蓋其中有義焉。非如今之承順比昵。便以得朋自矜詡。余聞之。賢者弗昵。昵者弗永。故骨肉非義久必殘。鄉族非義久必睽。況朋友原以義合者乎。同氣則求。同求則義。同義則久。故曰君子有交。小人則否。蓋君子敦篤乎君父之大。而旣翕好合。一身全備之。方能出而問天下士。親見其人之可交也。然後通名姓。具拜問。告祖父。而締盟好。屬之以人倫之重。而託以終身之業。故不明於五倫。而欲善一倫。未見其能安也。不明於友道之關。五倫。而欲以敦友倫。未見其盡善也。余廿年從伯順侍一泉先生。而定交懷。洙公其於友服之義。聞之頗悉。迄今回首當年。奉杖履而坐春風者。人人

各厭所欲而往真趣淋漓不知主客終先生之世無損友之害至懷洙公與奉常同被難一被兵殺死一偶不被殺而不死然竟以不被殺之身而臥護殺者之屍三晝夜真古人所謂共死生同患難者矣余與君家交三世竊自幸親見古人是箋也箕生固得其鉢於祖若父者也問序之言曰京輦朋簪如雲而獨借文於數百里外其意正不草草余固知其意故不敢以愚昧寡識辭而聊附一字於簡末

鹿氏家訓序

古來象賢稱難尤難於累代高賢之後以觀鹿氏何祖燕孫繩炳如也靜觀少秉祖太常公教鳳毛蔚起洎太常殉難靜觀舉於鄉已又奉父解元君之諱手三弱弟上食曾大父淚隨匕落嗟痛哉靜觀顧念祖父身殉忠孝高祖侍御實用直諫導崑崙至曾大父夙敦孝友尤以拚軀急左魏諸君子之難誼高千古淵源懿烈萃於榮疚何得痛而忘懼暇則手纂高曾以下往還家信聿當耳提題曰家訓蓋一家精神流注絕不及私卽寸楮往復罔不於倫常大義洗發彪炳淵源厥有自也以啓曾大父輒然爲加一餐曰有是夫孺子志氣可嘉也予獨謂而祖若父文章垂世從德性發皇何雷震霆破睡且不睹神廟間諫章光日月者誰歟經國繩家燦若球璧而斤斤茲纂何爲靜觀曰固也先業在天壤不穀惡能忘顧公諸世者未敢私然私諸家者又何敢不私郵筒寸楮一節而全體之所爲備韋絃作佩竊比滴骨滲血之義云爾是時適奉太常優恤之旨蓋太常殉難年餘題卹未果解元匍匐叩閭實以鬱悴致殞一時大忠純孝震涌星河無何贈蔭祠諡煌煌交錫人謂精誠所格也會有以蔭秩爲大宗諷者靜觀悽然曰是言胡至於



耳。不穀少稟先訓。名義大關。聞之已悉。業微芘鄉書。又何忍祖若父。化血椎心之慘。先吾子而後弟。且奚慰曾大父。衰年一慟。予聞而偉之。嗟乎。此詎可聲音笑貌爲哉。居恆檢飭名行。裕如耳。而非迫試於顯名。厚實。手足骨肉。軒輊之衡。則火焰不發。比於先微。使捐軀不烈。叫帝無靈。而徒生博忠孝信友之名。非倫常一大詬耶。廢秩一節。義概凜然。知靜觀是訓。不徒纂以手矣。予辱太常肺腑之雅。四十年存沒關心。今可破涕爲笑。則謂是纂也。可以教慈。可以教孝。可以教忠。可以教義。祖孫父子。名教干城。有心人當不河漢予言耳。

### 北海亭集序

昔年鹿伯順認真草十五種梓成。而詩不與焉。曰。不欲使人名我爲詩人也。然則何獨梓文。曰。亦不欲使人名我爲文人也。第隨地隨時。各有其事。無文以誌之。則精神恍惚。而不可據。故偶借語言。以寄其行事。并不欲使人名我爲矜名矜節之人也。噫。惟無矜名矜節之心。故利不趨。害不避。坦然揭日月而行。而卒以忠死。其詩與文。亦皎皎獨行。精光不可沒滅。今仁鄉之詩文具在。其格律與伯順固各有面目。然不欲以詩人名。不欲以文人名。不欲以矜名矜節之人名。則父子有同心耳。故於伯順之難。竟以鬱悴憂勞而死。忠孝兩倫。父子分據。總之。各以勢會。適然行所無事。初無矜名矜節之心。此其粹然盎然。完其所以爲子。卽完其所以爲人。又何恨隄於年。而功業未見於世哉。仁卿以辛酉冠京闈。聲光赫赫。居然有千仞覽輝之望。然仕進之志淡。如至如膺。宋九青給諫薦舉。部檄屢催。苦辭求免。是豈以窮達潛見二心者乎。父

沒之日。不茹葷。不御內。鮮華丈夫。毀者過半。親知有以醴酒乾肉勸進者。曰。先君子血漬禾土。當園野僵臥時。誰憐而進之食者。知者謂與魏忠節子學。泐父而死。南北數千里。前後正合符。忠節父子亦以患難接踵擁臥北海亭中者也。予與杜子君異。輯仁卿之詩與文。而名之曰北海亭集。集成。靜觀囑爲之序。予知仁卿之不朽。不獨在詩與文矣。靜觀駿才煥發。行且以詩文名天下。諒亦不徒使人名爲詩人也。名爲文人也。

贈孔氏兄弟序

文武本無分也。分之自兵民始。自兵與民分統。將與吏遂分治。屬囊與載筆遂分業。因而舌鋒劍鏑。種種觴輕重之情形。并分左右祖。故時平以大帥仰小吏之鼻息。世亂以悍將制僛儒之性命。錢穀器甲城守。攻戰紛出。相角而不相習。國家倚重文武。何事而凌競至此。經世淵源。且望不具論。間以中朝卿士。出秉節鉞。壯猷元老。如方叔召虎。指可勝縷。六月之詠。鋪張吉甫。將略已備。飲至一燕。結以孝友。張仲相成之誼。甯願問哉。世事至今日。未敢深言。特嘗扼腕文武元黃。輒歎比肩事一人。何啻兄弟。是安得用同氣之誼。告迺今於孔君兄弟有當也。君諸父起家文事。而沈毅忼爽。實著燕南。余交最久。所得張子于度劇談。又甚悉君兄弟。遂各以文武應當途之選。客歲己卯。公諧捷武闈。庚辰。公參舉茂才。于度走相告。余喜不寐。非第爲君兄弟喜。并爲當世文武吏士告也。諸儒有經。而精於談兵。亦稱經。可見經常一脈。亙天地古今。同源而貯。文與武。特分領而未可分岐。是何殊分形異名。而稱兄弟。迨邈及同氣。又作何觀。此誼不講。

文人薄刀戰。武人遂薄章句。如所謂舌鋒劍鏑。騎輕騎重。陷阱百出。至舉國家錢穀。器甲。城守。攻戰。死生。功罪。徒付一擲。可勝浩歎。閱牆二字。中士羞稱。今以文武閱牆何多也。沈疴難醒。天若特就君家。同氣中。標出文武二義。使人回首一思。舌劍相激。奚啻培擊手足。舉一切冰炭。都消歸同氣。變左右袒。爲左右手。世事庶有廖乎。公參文藻久著。公諧從往督師。以膽勇稱。還復同華。午嘉十顧。余訂盟忠孝。虎觀麟臺之業。固君家自具。余故不爲君兄弟喜。并爲當世告。爲問天地生吾有意無也。余客百樓。故文皇征遼。駐蹕處。危樓環峙。遺址巋然。議者謂不減武陵深隱。頃君叔養邃過余。愾然曰。此未足特。往高陽師。相爲守關。計。迺畫地數百里外。守甯遠。迄以固圉。目前盜警正殷。落落數樓。可終避乎。爲指畫村居外。某可臺。某可堡。而中堅犄角諸樓。遂屹然成重鎮。至今想揮指風生。余腋猶習習也。養邃文士。迺武略爾。爾知於家庭間。籌豎立至熟。于度試。以余言質兩君。文與武分曹否。戰與守分級否。簪筆廟堂。荷戈原野。分委任否。今天下未可謂無事。則君家父子。叔姪。兄弟有餘師矣。又聞君家有弟公亮。年少英英。具遠識。抱偉略。且兼兩兄之長。然則孔氏之興。其未艾乎。

贈羽士趙東明序

聞之耿廣舉云。南王村有羽士趙東明者。其人入世不深。究心岐黃之業。業遂以入世不深而進。予固善病人也。吾家子游。其病更甚。每延之來。果隨手奏效。廣舉又謂其人。不獨業進。而日用所需。有則傾儲與共。無吝心。無則粗糲自甘。無忘心。迹其所爲。殆似有道之人焉。予聞而異之曰。吝心與忘心。兩念相環。柅

枯千古卽眞實學道者有意無言萌芽尙在非克己之盡漫云去吝而祛忘吾不敢信也東明之無吝心無忘心果得之學力之後耶抑質任自然生而不爲世網所羈殆天機之偶合耶其人能逃楊歸儒則車裘共敝釜瓦生塵者當攜手同車矣廣舉云東明之歸楊也蓋有不得於家庭骨肉間故借楊以爲寄卽其攻岐黃也亦借岐黃以爲寄總以天地爲蘧廬身世爲逆旅在昔清平之世且多黃冠之遊今何時也頻年鉦鼓日不停撾室家廬舍蕩然灰燼文武將吏日死於法者不知凡幾而搢紳國老且接踵殉城何如寄迹於楊寄迹於岐黃猶可以自適其適耶予聞而黯然者久之不復置喙廣舉遂合同志爲文而告於禮曹吾家子游亦以其言贊之遂給劄云立志清修身無非禮之事苦心醫業手無難療之人投劑不問貧窮惟勤惟慎謝儀恥言多寡曰儉曰廉旣無忝於元門兼有功於利濟信斯言也東明殆所謂有道之人與諸君子不欲委此劄於草莽也予爲次第其語以遺之

王顯又入國學序

憶辛丑予遊成均時司成楊荆巖先生予庚子座師也一見輒謂曰子年少登賢書此來豈爲入官地耶京師天下英才所萃吾爲新學宮數楹子等肄業於斯作一事有一事之慊心歷一境覺一境之得力方見友天下友千古之意每一念之孤負師恩輒爲汗下今王子顯又亦且遊成均試思此何時哉自京師至海隅無處非驚心之地自宰相至散僚無處非束手之官顯又諒非借此爲入官地也客曰今天子加意國學每欲破格待人從此入官路亦稱捷况從來國有大事臺諫不得關其說太學生伏闕上書如陳

東者流。何嘗不可表見於後世。第患其人非。則位愈高。而損於己者愈大。其人是。則名愈隱。而全於天者益多。又何論入官不入官哉。予曰。宰相以身係天下之安危者也。臺諫以言係天下之安危者也。古昔盛時。明良魚水。諫諍無名。自宰臣失格。心之益。諫臣乏補。袞之忠。而散秩末僚。暨書生輩。始憤然有不平之鳴。陳東所諍。係君子小人邪正之分。李伯紀一用。宋事猶可爲。卽如鎮海君一事。未聞宰相作何主持。台省如何申救。獨郎署一言。罪罹不測。使陳大陽而在。能叫九閭。叩天王明聖乎。予固爲顯又籌之矣。顯又母老。而後嗣未立。自鼎又捐賓客。而嫂氏以義烈殉。熒熒猶子。相倚爲命。夙昔之事。親從兄者。今且專其爲人子之事。又代兄而兼爲人父之事。則履危蹈險。正纖毫不得涉焉。客又曰。危險豈此之謂哉。順風覆舟。美味滋毒。伐性之斧斤。正在此。淫聲豔色。敗我之名行。斷不在拂士法家。烏知安之非危。而平之非險也耶。又烏知危之非安。而險之非平耶。故禍福吾不得豫知其禍福。疾病吾不得豫知其疾病。損益吾不得豫知其損益。子弟之賢不肖。吾不得豫知其賢不肖。所可知者。欲得福。免開禍端而已矣。欲卻病。謹其致疾者而已矣。欲受益。察其損我者而已矣。欲令子弟賢。勿教之爲不肖而已矣。顯又旣稱孝弟。謹信於鄉黨間。正當出而問天下古今之大。可徒悠悠自放。甘老巖穴哉。予爲之躍然曰。我之爲顯又者。淺子之爲顯又者。大。況久從游鹿太常之門。素講求於作人作官者。隨地自有慊心得力之處。定不虛此成均遊也。

### 新安縣志序

予讀高陽志。至孝子齊癩。以促燈爲業。日市酒餅餉其母。旁爲唱讚。以侑觴。又讀鹿伯順爲魏童子傳。其母他適。童子時傭於人。聞而急追之。爲奪者所持不能脫。踣地呼天。聲竭淚血未幾。怪風驟起。震盪衝激。昏霾蔽日。其母不能前。童子遂及之。得爲母子如初。此二事未嘗不疑其人之微末。事之細瑣。而以登於孝子之列。與忠臣義士循吏名儒同類而共稱之。似覺非倫。丙子春。僧鹿伯順過孫少師師儉堂。因舉以質之。少師曰。論人各隨其分量。以諸侯王之孝。律士庶人。士庶人何敢望。以士庶人之孝。律諸侯王。諸侯王豈屑顧哉。孝友之行。不以銀黃鐘鼎而加豐。不以說禮敦詩而始有。愚夫愚婦。行格神明。則庭中之愛。膝下之歡。視移情於少艾妻子得君者。此中正千里耳。人人親長。而天下可平。旣無煩借取。又無庸等待。長世作人者。無非啓之。以與孝與弟之良。各觸其事親從兄之實。風俗人心。以此稱美。詩歌文賦。以此與思。卽忠臣義士。亦婉轉而達其孝弟之念。烈女貞婦。皆篤摯而堅其孝弟之心。所謂爲仁之本。百行之原。意在斯乎。然則齊癩之日市酒餅也。常與茅容之殺鷄。老萊子之戲綵。同一情事。魏童子之孝感風雷。可比。三年不雨。六月飛霜。豈以其人之微末。事之細瑣。而易視之哉。伯順亦云。王汝止滿街皆聖人。全在此處看出。予聞而躍然曰。此可以得志之全體矣。傳前之循良。後之欲循良者。勸矣。傳前之賢孝。後之欲賢孝者。勸矣。世有升降。代有污隆。總人心爲之。人之賢愚好醜。雖憑世以轉。而轉否爲泰。轉危爲安。轉澆薄而歸醇厚。道之能與人之能與。不學不慮之良。一提卽醒。總是以人治人之事。若非其人之所有。而強以令民。堯舜亦必不能。然則志也者。其譜人作善之路。與人爲善之心乎。新安有考有志。第因仍其舊。文飾

所未備。景前事以爲師。總後事而有據。顧享今之逸者。不念前之勞。概忽爲他日之文。而不原其著作之始。則義之所不敢出也。

張郎鴻勳舉秀才序

于度張子。三十年來爲大河以北萬不可少之人。垂髫從鹿伯順游。伯順謂余曰。之子嶽嶽自立。英氣逼人。人以此見短。我以此見長。辛酉以明經備選。受知左公浮邱。其受知浮邱也。以先受知於魏廓園。二君之重于度。皆以氣誼。不獨專在文藝。乙丙左。魏羅璫禍。于度冒死周旋。南國有心人。比之魯朱家。俠氣之名滿天下。甲申錢牧齋曾具疏以聞。南中之企慕于度。真如麟鳳。又不止爲大河以北不可少之人也。咸知中余與于度相知深。三入雙峰。患難與共。百樓六載。比鄰而居。每挑燈細語。對月深談。余懷無不可告于度。于度有懷。無不可令余知也。逆聞逼畿南。士子赴選。于度曰。頭可斷。官不可受。勁骨雄心。伯順所謂嶽嶽自立者。蓋蚤見於垂髫之際矣。于度早失怙。獨力奉母三十餘年。沒復獨力襄大事。撫弟姪輩。倍極苦心。事親立身。昭然在人耳目。今其子鴻勳舉秀才。夙昔觀型於事親立身之際者。既熟且久。其所以慰親心而展子志者。當必有在。或不沾沾以一子衿爲得意也。人生所歷之境。富貴而外皆逆也。余謂貧賤何逆之有。當貧而貧。當賤而賤。則貧賤有餘榮。不當富而富。不當貴而貴。則富貴有餘辱。伯順常云。貧字攪舉人。此是生平最得力處。孔顏之蔬水箪瓢。非道之貧賤。尙不可去。況道中之貧賤。不能恬而安之。又烏能歷造次顛沛一切患難之境哉。伯順衣鉢承受者寥寥。于度三十年名宿。隱然係一方之望。故因是

舉而及之。若云爲子衿贈也。非余意也。并非于度意也。

和論語頌序

論語何爲而有頌也。宋儒張無垢有會於尼山之心。隨摘一句而贊歎之。歌詠之。以被之於聲詩者也。頌何爲而有和也。吾友賀懷庵有會於尼山之心。并有會於無垢之心。又各就無垢所頌之句。而補綴之。翻釋之。以共被之於聲詩者也。各八十八首。夫謂此八十八首。遂足盡尼山之蘊乎。非也。自其散殊言之。千萬言未盡也。自其本源言之。一言可盡也。不見夫春乎。發於姚魏。則黃紫爛然。發於幽枝細草。則嫣然自媚耳。又不見夫月乎。臨滄波。俯平沙。則鋪灑萬里。若其小砌閒庭。則幽冷可掬耳。尼山正猶夫春也。月也。元氣淋漓。山河大地。一齊蒸動。中天皎潔。幽谷遐方。無不照臨。無垢所頌。第就無垢見之。而尼山之面目。無隱於無垢。懷庵所頌。又就懷庵見之。而尼山之面目。亦無隱於懷庵。嗣是而再有所頌者。千人百人。各任其挹取焉。而不禁。然其蘊仍淵然穆然。終古未有窺也。尼山以一身統天地帝王之全。子思能頌之中庸一書。皆所以註解論語。孟子願學孔子七篇。皆頌述孔子之意。迨有宋諸儒學術醇正。雖論議微有不。同。然皆不謬於聖人。無垢龜山高弟。刻勵向學。而孤行其意。其所自得深矣。懷庵雅好讀書。畿南學者。稱其負氣不偶。激烈慷慨。有登車攬轡。澄清天下之志。余謂此志非學不實。此志非學不滿。半部論語。佐太平亦豈在多。況其鄉竇子聲得伊洛之傳。爲元大儒。懷庵紹明其學。須先範其身型。此論語頌之所以和也。程子曰。讀論語有讀了後。得一兩句喜者。有讀了後。知好之者。有讀了後。不知手之舞之。足之蹈之者。



懷庵之和論語頌。殆庶幾乎無垢之言曰。精粗本末。初無二致。下學上達。敢以聖賢爲法。願懷庵亦從事於此。不必求頓入驚懸妙也。

代成有終卷序

余嘗讀坤卦六三。地道無成。而代有終。則知臣道妻道。旣待天以始之生。不能不代天以終之成。從來臣事君。妻相夫。處事之常。與遭時之變。有令人唏噓讚述而不能已者。魏鄭公云。願陛下使我爲良臣。勿使我爲忠臣。至哉言乎。夫人臣何樂乎以忠見哉。時平事理。都俞一堂。皋夔之世。較龍比之世何如。此可想紅顏孀婦。視白首伉儷者。自不可同日語也。李子景尼有母張。年十六。歸其父九苞公。方弱冠。公齋志以歿。是時張年始十九。堂以上白髮蕭蕭。有姑待養。遺孤長時。可兩歲餘。次行可卽景尼。甫三月耳。張曰。未亡人唯有相從地下。他所不及也。遂絕粒。姑薛母王。再四泣諭之曰。女若此。圖其易矣。呱呱兩兒。命寄如線。李氏其不血食乎。曷若爲其難者。數日稍進勺水。毀容茹淡。奉孀姑。育兩子。躬親紡織。細大兼營。姑病而請以身代。子長而戒以就學。夫子有兄貧。而粟粒以週。歿而棺衾以葬。一身而爲李氏也。子者。一身而爲李氏也。父者。而後可以死。夫母以節著。人子所不樂聞也。當其悲風咽月。相向瑩瑩。未亡人之心事。特唯有子。而子念陟岵靡依。瞻我所恃。所以慰孀闈之艱苦者。正人子終身之事。景尼每向予言。生不識父。念母氏五十年。飲冰茹雪。泣輒數行。下憶癸未甲申閒。天子曾下旌廬之典。宗伯以時艱未覆。余兄弟讞陋無聞。實慚我母。敢借仁人一言爲重。余山人也。烏足以揚母節。然知母節之悉者。莫山人若也。存之野

史藏之貞珉。山人之意而寵之綸音。聲之歌詠。則又嗣君之心也。試觀史冊中稱令母者曰陶母。曰范母。使非有祝也。滂也。豈能垂令名於後世哉。母以節成子之孝。子還以孝揚母之節。地道代天以有終。婦道代夫以有終矣。因題代成有終冠於首。以質之好德者。

送江公孫歸盱江序

江右江公孫鄧潛谷之鄉後進也。生平私淑有學。兩爲博士弟子。師上習其賢。士服其教。以久秩遷新鄉丞。求退不許。勉就官。齋署蕭然。嘗脫粟不繼日。杜門手一編自娛。邑紳士之賢者皆儲酒招與論文。卽上官亦皆以老儒目之。每就余夏峯商學。信宿忘返。旣念母老。迄歸。臨路謂余曰。歸去期十年讀書。不敢以老廢學也。余曰。君可謂志士矣。江右理學之藪也。諸儒輩出。源淵不遠。抑知學之所以爲學乎。學者聞見日富。耳目日勞。無不晰心性之微。嚴儒釋之辨。至論陽明無善無惡心之體。則曰。心與性一也。心之無善。亦可曰。性之無善乎。余嘗思之。天命謂性。此性之至善也。先正其心。心可同於性乎。大學言誠意。論語言無意。中庸言慎思。繫辭言無思。要會得時。說一亦可。說二亦可也。至儒釋論心性處。原自有分。窮歸究處。更自懸絕。乃以虛誕之辭。文其假竊之柄。總之。認心與性不真。以虛明爲端倪。以枯寂爲未發。心非統性情之心。而性亦任氣質之性。學愈晦於天下也久矣。潛谷之學。能會其大於諸儒。訓述有辯。五經有釋。余嘗服膺其說。君之鄉有謝秋水。宋白石二君子。歸幸以予言質之。

# 夏峯先生集卷四

序

## 俊傑傳序

予過公望多景樓。樓頭几上一編曰俊傑傳。傳凡八人。漢之子房。孔明。唐則懷英。子儀。宋稚圭。希文。與元晉卿。明誠意。噫。此八人者。真千古俊傑也哉。八人而非俊傑。誰當稱俊傑者。水鏡之言曰。識時務者是謂俊傑。一時有一時之務。一人有一人之時。不甘以凡民自囿。便是以俊傑自期。爲之卽是其誰限之。公望靜息多景樓。日與此八人對也。其識趣過人遠矣。憶茅止生嘗謂予與伯順曰。劉元德一庶宗耳。四海無家。徒以一言結無地樓臺。欲臥元龍於百尺樓上。千載下。遂以百尺樓專屬元德。他人不得過而問焉。今我輩固各有百尺樓也。不知誰當據其上者。伯順問止生。止生曰。吾欲臥郭子儀。李光弼耳。伯順曰。吾已延陸子靜。王伯安矣。予曰。陳大邱。郭林宗。是子客也。今公望臥此八人於多景樓。其好客過吾儕遠甚。多景樓固當與百尺樓並峙千古矣。公望爲蘇門先生嗣。負高才。守先蔭。李德裕一流人。甲申後。銷前代蔭。一意恬養。絕意仕進。非所稱識時務者耶。其手錄此八人也。亦所謂奪他酒杯。澆我礪塊耳。

## 隱逸傳序

余幼讀書。妄意當世之務。迨四五十無聞。志不獲聘。而良圖弗集。念遂中阻。遠取皇甫謐。阮孝緒。暨薛應旗所編高士傳。讀之欣然。有會錄。巢許嚴陵。而下數十人。晨夕悟對。亦師亦友。竊慕爲太平無事之民。東園之樹。枝條再新。業不增舊。願與時違。故國旣難久安。遂攜幼過共城之野。得交郭君公望。商考古昔。逸士公望另開手眼。以不認於聖人。隱君求志。行義達道爲則。蓋所謂龍德而隱者也。或飛或躍或潛。迹固不同。總此龍德耳。所取僅七人。分四科。周茂叔。邵堯夫。傳之一。郭林宗。陳太邱。傳之二。管幼安。陶元亮。傳之三。劉靜修。傳之四。遇各有時。人各有志。公望曠觀上下。而有麟鳳松柏之歎。以余觀之。古今邈矣。有道仕無道隱。何代無高人逸士。廉頑立懦。而獨取此七人爲合孔氏之隱。蓋亦其志之所存也。魯論載楚狂。丈人。晨門。荷蕢。儀封。沮溺。七子者。孔子之所謂隱者也。然非孔子志之所存也。蓋孔子東周之志太熱。而七子忘世之心過冷。七十二君不用。卒與羣弟子修明六經。歸老洙泗之上。俾天下後世見其志。夫亦各有所取焉耳。公望前有八俊傑傳。後有七隱士傳。俊傑而奚止於八也。八人乃行義達道。仁覆天下者也。隱士而奚止於七也。七人乃隱居求志。天下歸仁者也。求志者求此仁。行義者行此仁。此孔門用行舍藏之旨。孟子謂禹稷顏子易地皆然。八俊傑。七隱士。亦所謂易地皆然耳。今有人焉。樵西山。釣東海。攜手雲林。舍公望其孰與歸。

麟書鈔序

明三百年祖德深厚。臣之以忠死者多矣。最烈者得二人。方正學之死靖難也。黃石齋之死鼎革也。一始

之一終之純忠大義。百折不回。前後有同揆焉。其邃於性命。精於詩文。兩先生亦莫不合。劉念臺先生序明理學。以正學爲首。倪獻汝序理學宗傳。以石齋爲終。人謂其節太奇。死太烈。理學先生見幾明哲。似不如是之癡。劉倪二公。正謂其節之奇。死之烈。忠到足色。方於理學無憾耳。舍忠節。別無理學之骨。死生去就。歸潔其身。豈可以一律論。近世談學者。大約繩趨尺步不開。人以指訾之端。有破一成一之見。犯曲學之忌者。羣起而詆之。不遺餘力。卽如范文正。司馬君實。則以其功業太盛。方正學。黃石齋。又以其節烈太奇。噫。理學而必無事功。必無節烈。則一鄉黨自好之士耳。奚孔孟之足云。竊思道統肇自伏羲。而堯舜禹湯。文武周公。以至孔子。自孔子而顏曾思孟。以至周程張朱。其人止矣。豈皋箕伊。傅不得進。而與程朱比隆耶。蓋唐虞之時。五臣皆聖。春秋之際。閔冉皆賢。取其最者而已。孔子曰。賢者識其大。不賢者識其小。莫不有文武之道焉。孰謂周程得與斯道之傳。餘皆爲門外人哉。忠節亦學也。事功亦學也。文章亦學也。莫不有孔子之道焉。是豈可以執一論哉。石齋著述極富。大滌函書最後出。其門人以爲絕筆。又名曰麟書。博兒錄其文與詩若干首。因序之。

### 中州人物考序

余來中州九年矣。中州之賢豪長者。同時而我不聞。我之不能取善於鄉。可知也。過去而我不聞。我之不能尙論於古。又可知也。語云。蓋棺乃定。姑無論同時。則尙友古人。可或靳歟。殘年山棲。無所事事。偶於素聞素見者。得百十餘人。均之爲人物耳。或以理學著。或以經濟稱。或殉難一朝。而以節義顯。或抒忠有素。

而以直諫名。或居身不苟。立朝有聞。人亦不得以一節目之。則方正之謂也。此五者。途轍雖分。而本源乃合。第就其時其地。各成一品格。所謂君子亦仁而已矣。何必同。或曰。武與文。則迥乎不同矣。予曰。不然。文以經邦。武以勘亂。簡武不可。簡文亦不可。故益贊盡德。曰。乃武乃文。智仁信勇嚴。甯直將道。亦相道也。亦君道也。若隱逸。則不以文武著。稱抱道於身。未用於世。世有不可必之行。而我無不可必之藏。所謂隱顯一致耳。故敘列六科。而以隱逸終焉。是集也。始自明代一世次爲敘。神廟以後。成案未定。慮有遺失。故人不厭多。在中州言中州。存之以助一己之渺修。且以備中原之野史。嗣後有聞。尙期續入。

畿輔人物考序

予考中州人物。規模略具。有燕趙士。過視夏峯者。曰。吾鄉勳名節義。不減中州。豈可無述。因據案頭諸書。暨夙昔所聞見者。次第之。類分例議。一如中州。按自洪武戊申十六傳。至崇禎甲申。二百七十七年。有開國靖難之功臣。有遜國之節臣。正統己巳之變。去戊申八十餘年。於時死綏授命之士。視建文時何如哉。說者曰。高皇作人之化。既歷三紀。世變風移。故得養士之報。而遜國諸忠。殺戮太慘。未免干和。夫高皇之制。中官不得干預政事。而逆瑾。逆賢輩。相繼煽亂。屠戮忠良。夫賢人者。國之寶也。人之云亡。則邦家未有不殄瘁者。蓋爲善者誅。則人相懲而不爲善。人相懲而不爲善。則何所不至矣。瑾。賢二案。士大夫以節見者。亦不少。然士大夫何樂乎以節見也。甲申大難。人主卽銳意有爲。而元氣銷鑠殆盡。欲速瘳。適以促之。速亡耳。平時危言潔行。與臨難抗節死忠。原非二致。而神京陷沒。死社稷者。僅二十餘人。以視建文時。又

何如哉。嗚呼。人才關氣運之盛衰。士氣係人才之隆替。而其原本。總造於大君之一心。予述明代二百七十七年來。歷幾成案。案各有人。人各有事。畿輔爲京師首善之地。更不可缺。第愧衰遲寡陋。聞見不博。敬俟後之君子。再爲考入。

### 大難錄序

從來盜賊禍人國。時有之矣。然未有帝后、妃嬪、太子諸王俱羅弑逆竄逐如甲申者也。凡有心者。尙忍言哉。當時外城旣陷。帝猶詔對廷臣。爲守內城巷戰計。數問無一應者。乃推案憤起。手刃公主。令國母投繯。復殺妃嬪數人。縊於萬歲山。噫。慘矣。按先帝憂勤十七載。苦心危慮。志欲有爲。而竟蹈敗亡禍亂。以爲天下惜。由此言之。上有失國之君。下有興王之臣。其國欲亡。不可得也。上有保治之君。下有致亂之臣。其國欲不亡。亦不可得也。蓋英斷之主。固自有神聖之謀。而內外臣工。復伏心緘口。以俟上意之所存。天下豈復有臣哉。賢才凋謝之後。國逢多難。元氣銷亡。立欲振起。此欲速所以不達。以致哲辟殞身。愚賤飲泣。曲沃、井研、通州、穀城輩。不知何以施面目也。從古無平而不陂之理。迨其陂也。不歸過於其君。則諉罪於其臣。皆偏執之論。豈情之平也哉。憶遜國時。文皇以叔代姪。勢成於相激。而一時靖節之臣。死者死。遁者遁。不下數百人。逆闖犯順。至尊龍馭。禍慘於黃巢。而殉義之臣。不及遜國一二。豈前此盡忠良。而後此盡頑冥。與蓋有所以作之也。遜國當高皇培植之日。人人思所以報高皇。況值國運初開。未經斲喪。嗣是而後。幾番璫禍。幾番摧折。人之云亡。邦國殄瘁。則甲申諸臣之死。其忠肝義膽。出於摧折銷鑠之餘。視遜國時。

其難與易爲何如也。此志也。雖與日月爭光可也。

兩大案錄序

兩案錄者。一錄從來創業之君若臣。一錄從來中興之君若臣。蓋此兩案者。舉世莫大焉。而千古之英雄豪傑。經世宰物。莫有外焉。故錄之也。或曰。主聖臣忠。不必盡在創業與中興。曰。此原不可與守成者同日論也。不階尺土。不藉一民。赤手而混一海內。事誠難矣。若噓旣燼之灰。尋已墜之緒。疎迷而恢復大統。亦豈易言。然中興又視創業之規模小大。元氣厚薄。以爲後起者之縣促。漢高以匹夫而有天下。東漢節義之盛。超軼前代。昭烈猶能以偏安一隅。繫漢九鼎。蓋天原不輕生一大有爲之人。經幾屯蒙晦塞。戕夷殺戮之慘。始生一人焉。以底定之。而一時之雲龍風虎。共濟時艱者。無一非承帝心之簡在。而此一人與衆人。不知費幾許心力。歷幾多死生。而始成一代。永清之烈。以仰答天心。亦艱矣哉。若以易心承之。鮮有不顛墮者。人徒見功之難成。若謂天之不欲平治天下。且疑天之私暱奸雄。豈知陰陽消長。氣機感召。有數存焉。天且不能違。而況於人乎。兩案之人。不能盡舉其著者。亦有我見爲著。而人見爲平。人見爲平。而我見爲著者。各存所見而已矣。英雄有濟事之才。英雄有成事之時。才與時相值。則身享道泰。無疚無惡矣。如非其時。而氣凌膽決。豈甘俛首下人。故欲濟一時事。遂不暇計千載之名。夫行一不義。殺一不辜。得天下不爲。此三代盛時事。帝降而王。王降而霸。霸之後。將不堪言。予謂古今治亂。商周之際。其順天應人之舉。不可無武。周至於叩馬一諫。不可無夷。齊若天地之大。日月之照臨。而垣星之不動者。亦寓於其間。蓋



撐持宇宙。運旋造化。英雄各以其時砥之耳。故曰：非人之所能爲也。天也。

### 貞靖夫人序

貞靖夫人郭宗伯蘇門先生繼配也。天啓壬戌。東事棘。朝臣爭送眷屬歸。公里居久。夫人新入門。先馳疏請纓。隨攜家輿疾就道。憂勞增病。甫抵國門。而病轉劇。遂不起。瀕危時。謂夫人年甚幼。雖四月爲婦。而義激於同讐。情疎於居室。故遺命遣之歸。宗伯諸子弟。欲遵治命。夫人以死自誓。千里扶柩。哀毀倍甚。旣葬。復申前議。夫人誓死益堅。經年坐臥一樓齋。素簡默。不問戶外事。當流氛狂熾。避亂山中。雖顛沛之際。不改常度。衆謀南徙。夫人曰：吾甯死此。不及亂也。與大參公淑人同宅而居。自奉淡薄。督婢媪輩。以勤儉閭政嚴肅。三尺童子。不輕出入。卽子姪輩。亦不輕相接。今年已五十餘矣。朝廷功令三十前守節。過五十歲者。例宜旌。又命婦不旌節。以節其所應操者耳。夫人自十五居孀。冰操幾四十載。乃以宗伯夫人而不得一邀旌典。余因有感於夫人之節。爲難能也。節以自靖。豈曰邀名。嘗稽六經所載。春秋與詩。節婦各一。伯姬死於火。共姜以柏舟自誓。宗伯例比古諸侯。而夫人以死自誓。共姜不是過。以十五歲誓柏舟之操。則尤共姜之所難。夫宗伯遺命。謂矢志從一。原不可概望之婦人女子。況琴瑟未久。正恐中情難慊。豈意夫人堅貞孤潔。歷四十年。自靖以自獻於夫子者。自問字正名己。終身而不渝乎。他日國史。自當有爲夫人立傳者。子曾識荆宗伯公。又交嗣君公望。茲同人各賦詩爲壽。按周禮。議諡。清白守節曰貞。恭己鮮言曰靖。雖非爲婦人設。而夫人之德潛有合焉。因僉稱曰：貞靖夫人。夫人姓李氏。新鄉人。

尤西川要語序

予輯中州理學一編。明代二百七十餘年。得理學之士。十有二。亦盛矣哉。按世次。曹靖修、生永樂。閻侍御、禹錫、生正統。何文定、許莊敏、王蒼谷、崔文敏、王肅敏五人。皆生弘治。繼其後者。則西川先生也。先生受學於王文成之門人劉晴川。先是靖修、文定、文敏。皆主紫陽。而先生獨尊信師門良知之說。門人孟公化鯉。化鯉之門人張公信民。其學淵源。不問可知。甯陵呂新吾、新安呂豫石。學各有得。樹幟中原。不謂中州一片地。多生千古人。而十二人者。河南一郡居其七。竊嘗論之。學以孔子爲崑崙。顏、曾、思、孟。則五嶽四瀆也。濂溪以周。伊洛以程。橫渠以張。紫陽以朱。象山以陸。皆能爲其山川重。所謂小德川流。總之以海爲歸宿。其道理雖有迂直遠近。朝宗於海。則一見不必相同。意不必相非。先生有言。能翻前人案。始能得前人意。若不得其意。而務爲紛更。是妄也。又曰。講學是解縛之法。有世俗縛。有賢傳縛。有聖經縛。有師說縛。有意見縛。皆是名利做根。解得此縛。纔是學。此文成宗旨也。中州之學。傳紫陽者有人。傳文成者有人。兩路俱足以證聖。後有興者。不必分左右袒。而一意進修。則善矣。道喪學荒。有師帥之責者。爭相與崇重理學。踵十二人而起者。甯有數乎。

曹月川太極圖西銘述解序

涇陽有言。河圖洛書。爲造化傳神。八卦九疇。爲河圖洛書傳神。西銘就既有天地說起。太極圖說就未有天地說起。其言明肅簡嚴。於諸書本末大旨。各開一局。不相假借。而要之未嘗不互爲闡明。攝持以統歸。

於一。是濂溪之太極。橫渠之西銘。實三代以下庖犧也。然後世知元公者鮮。紹興乾道間。屢以二程請配孔子之廟。而祀於學宮。皆不及元公。至有疑無極之說。出自老子。詆言排之。噫。可謂文戾矣。若訂頑砭愚。上推極於乾父坤母。下推極於戲言戲動。語大天下莫能載。語小天下莫能破。深哉。誰其知之。月川子於太極圖說暨西銘。大都以朱子爲依歸。獨辯戾一則。所以效忠於考亭者。良工心獨苦。謂朱子之解太極。既云有太極。則一動一靜。而兩儀分。有陰陽。則一變一合。而五行見。及讀語錄。又謂太極不自會動靜。乘陰陽之動靜爲動靜。信此則疑彼。信彼則疑此。此所謂一人之說。而自相齟齬者也。不知者謂與紫陽爲難。豈知大道無我之公哉。不戾於周。何戾於朱。故月川效忠於考亭者。其心獨苦耳。孔子觀天道於獲麟。始表章易。詩。書。禮。樂。春秋。以憲萬世。此兩者終天地。而始天地。其功如是其大。而一字一辭之戾。後儒正不妨平情定氣而商訂之。豈可以一字舛忤。便成罪案耶。月川之訓述二子也。嘗議論紛紜之日。獨標中正之觀。以立隆於後世。非承洙泗洛閩之傳。而窺其奧。孰能至此。其訓述之功。且與朱子表章之功並矣。

#### 四書近指序

或問學何爲也哉。曰。學爲聖人而已。曰。聖人可學而能乎。曰。可。孟子曰。乃所願。則學孔子也。曰。仲尼日月也。猶天之不可階而升也。烏能學。曰。日在天之上。心在人之中。天與日月不可學。亦學吾之心而已。心以天地萬物爲體。其操功卻在日用飲食間。故曰。不離日用常行內。直造先天未畫前。盡心知性以知天。而聖人之能事畢矣。周元公曰。聖希天。程明道曰。聖學本天。孔子亦曰。知我者其天。天之外。復何事哉。夫子

假年學易。而以不息法天。行在春秋。以天自處。卽魯論二十篇大之言仁言德。細之日用飲食名色。雖殊。要之文章皆性道。維天之命。於穆不已。聖人以至誠配天。同一不已。誠者。天之道。誠之者。人之道。時習之。學。殆所稱盡人以合天。則人也。而實天者乎。魯論所載。無言不可會通。然其教之所重。而本之所匯。則時習一語。足盡諸賢之蘊。故曾子得之。而明德至善。子思得之。而修道而教。孟子得之。而集義養氣。以塞天地。皆所謂一以貫萬者耳。不能得其一者。讀書破萬卷。究於自己身心。毫無干涉。窮年矻矻。終老無聞。余嘗與及門二三子拈學。而時習一語。六經四書。不能滿其分量。千聖萬賢。不能出其範圍。卽如清任和至不一也。而所以一之者。曰。皆古聖人也。微箕比干。至不一也。而所以一之者。曰。般有三仁焉。支分派別之中。自有統宗會元之地。若其必不能一者。是其端與我異者耳。非本天之學也。孔子曰。不知言。無以知人。孟子亦曰。我知言。魯論二十篇。無一言不載聖人之精神。色笑而出。二千餘年學聖人之學者。戴聖人之天。而忘其高。履聖人之地。而忘其深。此仲尼之天地。所以爲大也。劉靜修著有四書精要。惜久失傳。鹿忠節說約一編。刻畫生動。余耄矣。偶讀論語。復識數言於首。標曰。近指。以告吾黨士之共讀四子書者。亦以示不可求於遠且難之意。

重刻四書說約序

鹿子伯順爲及門說四書。矢口了然。言無滯義。彙爲說約。久已梓行。其旨蓋取子輿博學詳說。將以反約之意。夫博與約非二也。博原自約出。非博不能約。約原自博具。非約不爲博。是義也。孔子嘗言之。顏子亦

身承之。故曾子之修齊治平。一本於誠意。子思之中和位育。一歸於慎獨。卽上遯堯放勳。舜重華禹平成。博矣。而一廷授受。不外執中。何其約也。豈獨帝王四時行。百物生。博莫博於天矣。而維天之命。於穆不已。萬古此行生也。萬古此於穆也。又何其約也。一越其宗。卽爲畔道。諸儒繼起。各以所見爲發明。如周之無欲。程之主敬。朱之窮理。陸之本心。王之良知。皆從浩博中體認精微。所謂殊途而同歸。百慮而一致。無非說約之旨耳。今天錫復刻此編於楚。附以近溪語錄意。謂伯順之說。得之陽明最深。而近溪之說。與陽明合符。予謂由陽明而子靜。而純公。元公。豈有不符哉。由純公。元公。而顏。曾。思。孟。以遯之孔子。豈有不符哉。由孔子而建天地。質鬼神。考三王。俟後聖。亦豈有不符哉。總之本諸身者是。則言無不合。言合而本諸身者非。卽合亦離也。竊願學人。因伯順之說。觀伯順之行。予自丁酉交伯順。至丙子。蓋四十載。深知其爲渾成。虧齊得喪。一死生之人。故其所說。皆躬之所行。未可以語言文字爲融通了。晰觀也。伯順生平極服膺朱子晚年定論。謂王子爲朱子功臣。又何有朱陸之異。而約之不一哉。

### 劉文烈遺集序

人生天地。藐焉中處。卽百年亦且暮耳。然其形雖微。而有可以參天地者存焉。其時雖無幾。而有可以與天地相終始者存焉。故君子當平居無事之時。凡有關於忠孝大節。必慎守深惜。罔敢殞越。及當大故。臨大難。其所以參天地者。以之而立。其所以與天地相爲終始者。以之而行。以余所知劉文烈先生。殆其人歟。先生弱冠舉於鄉。卽剡勵躬修。綱維風化。自任逾壯。始及第。嘗曰。周程張朱。今知所從事。區區博一第。

非吾志也。與劉公宗周、金公鉉、吳公甘來、總總爲斯道斯民憂。當逆闖猖獗、建幟擁旄者，不肯實心辦賊。公每向當事區畫深遠，皆格不能行。暨勢已危迫，遼友門人輩僉商進止，公曰：國存與存，國亡與亡，古之制也。竟以身殉。妻妾皆就義。嗟乎！禽視鳥息於天地者，無論卽矜激於意氣，慨慕乎聲聞，此中顧戀遲回，涕漣兒女，卽非中庸之行，且猶不能與蹈白刃者同科。公致命遂志，妻妾同殉，非刑于有素，安能從容引決？若是乎！孔子曰：殺身成仁。孟氏曰：舍生取義。蓋亦時至事起，中心安焉者也。雖一身之微，百年之頃，而所以參天地、終始天地者，正借乎此。自天地未生之初，極天地旣壞之後，前瞻後察，獨此一段忠孝精光，巍然不磨。公之生也，洵不虛生，而其死也，真不死矣。予生劉文靖、楊忠愍之里，嚮公於生前，匪朝伊夕，予有甲申大難錄，中州人物考，皆詳公殉難事。曾過雍邱，欲謁公祠而不可得。聞公之子講山，能克家難，後自毀不仕，未幾以憂卒死。冢孫菖石，始梓公遺集十二卷行世。菖石過予蘇門問序，予欽公之人，固不待讀其文。今讀公之文，當益欽其人。蓋人與文，未可岐視也。周程、張朱之人，至今在，則其文至今在也。龍逢比干之文，至今在，則其人至今在也。天下事皆可僞襲於一時，而言之所發，本乎志氣，聲容可假，而其精神不可假者，嘗存。今世之讀先生之文者，亦第謂卽先生之人而已矣。

遜義哀集序

或問辟世與遜世之義，予曰：辟世必隱，遜世不必隱。辟則入山，唯恐不深。古人所以有不留姓字於天壤者是已。遜則如天山之兩相望，而不相親。聖人處此，唯有不悔而已。辟世高，遜世大。此聖人賢者之所由

分也。余姻友三無道人，讀書懷古，嘗輯經書中遯世之旨，彙爲一帙，首取於易之潛龍，蓋唯有龍德而後可以遯，無龍德何以遯焉？簪組不足榮，禮義固無愆也。從來處士而盜虛聲，皆無所挾以自固者耳。荷簣丈人一流，總謂之辟世。夫子序列於論語中，未嘗不高其誼。至序逸民，不降不辱，中倫、中慮、中清、中權，皆遯之義也。遯之途寬，故遯之義大。堯夫有云：卷舒萬古興亡手，出入千層雲水身。其庶幾乎？

### 理學宗傳序

學以聖人爲歸，無論在上在下，一衷於理而已矣。理者，乾之元也，天之命也，人之性也。得志則放之家國，天下者而理未嘗有所增，不得志則斂諸身心意知者而理未嘗有所損。故見之行事，與寄之空言，原不作岐視之舍。是天莫屬其心，人莫必其命，而王路道術遂爲天下裂矣。周子曰：聖希天，程子曰：聖學本天。又曰：余學雖有所受，天理二字，卻是自己體貼出來。余賦性庸拙，不能副天之所與我者。幼承良友鹿伯順提攜，時證諸先正之語，嘗思之。顏子死而聖學不傳，孟氏歿而聞知有待。漢隋唐三子衍其端，濂洛關閩五子大其統，嗣是而後，地各有其人，人各鳴其說，雖見有偏全，識有大小，莫不分聖人之一體焉。余因是知理未嘗一日不在天下，儒者之學，乃所以本諸天也。嗚呼！學之有宗，猶國之有統，家之有系也。系之宗，有大有小，國之統，有正有閏，而學之宗，有天有心。今欲稽國之運數，當必分正統焉。溯家之本原，當先定大宗焉。論學之宗傳，而不本諸天者，其非善學者也。先正曰：道之大原出於天，神聖繼之。堯、舜而上，乾之元也。堯、舜而下，其亨也。洙、泗、鄒、魯，其利也。濂、洛、關、閩，其貞也。分而言之，上古則義，皇其元，堯、舜，其亨，禹、

湯其利。文、武、周公其貞乎。中古之統。元其仲尼。亨其顏、曾。利其子思。貞其孟子乎。近古之統。元其周子。亨其程、張。利其朱子。孰爲今日之貞乎。明洪永表章宋詰。納天下人士於理。熙宣成宏之世。風俗篤醇。其時有學。有師。有傳。有習。卽博。卽約。卽知。卽行。蓋仲尼歿。至是且二千年。由濂洛而來。且五百有餘歲矣。則姚江豈非紫陽之貞乎。余謂元公。接孔子生知之統。而孟子自負爲見知。靜言思之。接周子之統者。非姚江其誰與歸。程、朱固元公之見知也。羅文恭。顧端文。意有所屬矣。宗傳共十一人。於宋得七。於明得四。其餘有漢隋唐儒考。宋元儒考。明儒考。各若干人。尙有未盡者。入補遺。補遺云者。謂其超異。與聖人端緒微有不同。不得不嚴毫釐千里之辨。真修之悟。其悟皆修。真悟之修。其修皆悟。諸不本天之學者。區區較量於字句口耳之習。此爲學也。腐而少達。又有務爲新奇。以自飾其好高眩外之智。其爲學也。僞而多惑。更有以理爲入門之障。而以頓悟爲得道之捷者。儒釋未清。學術日晦。究不知何所底極也。此編已三易坐臥。其中出入與偕者。逾三十年矣。少歷經於貧賤。老困躓於流離。曩知飢之可以爲食。寒之可以爲衣。而今知跛之可以能履。眇之可以能視也。初訂於渥城。自董江都而後五十餘人。以世次爲序。後至蘇門。益廿餘人。後高子攜之會稽。倪余二君。復增所未備者。今亦十五年矣。賴天之靈。幸不填溝壑。策燈燭之光。復爲是編。管窺蠡測之見。隨所錄而箋識之。宛對諸儒於一堂。左右提命。罔敢屑越。願與同志者共之。並以俟後之學者。



道一錄者何錄。朱子晚年定論，并陽明王子傳習錄也。何以錄二子也。王子時有諍論，天下士多疑之。又若疑朱、陸之有異同也。故合刻之以證夫道之一。夫一亦難言矣。唐、虞、三代之時，道統在上。春秋戰國而後，道統在下。在上者，禹已不同於堯、舜；湯又不同於禹、文、武；父子也。亦迥然其不同，而謂顏、曾、思、孟果同於孔子。周、程、張、朱果同於顏、曾、思、孟耶。又何敢比而同之於堯、舜、禹、湯、文、武。此固天下士所不敢自信者。何怪乎動輒生異同哉。道原於天，故聖學本天。本天者，愈異而愈同。不本天者，愈同而愈異。夫天大之而元會運世，小之而春夏秋冬，至紛紜矣。然皆天之元氣也。諸大聖、諸大賢、諸大儒，各鍾一時之元氣，時至事起，湯、武自不能爲堯、舜之事，孔、孟自不能爲湯、武之事。而謂朱必與陸同，王必與朱同耶。天不能以聰明全畀一人，堯、舜亦未嘗盡堯、舜之量，孔子亦未嘗盡孔子之量。孔子集大成矣，聰明不盡洩於孔子也。朱子集諸儒之大成，聰明豈遂盡洩於朱子乎。陽明格物之說，以大學未曾錯簡論其理，非論其人，何妨於道之一曲。儒以此爲王子罪案，則隘矣。天下有治有亂，聖學有晦有明，皆天以聰明囿之，人力不得而與也。我輩今日亦只定我輩今日之議論，使前人之言而後人再不敢言，則墳典者，乃伏羲、神農、黃帝、顓頊、高辛之書，孔子不敢刪矣。春秋乃列國侯王之史，孔子不必修矣。傳註有左邱明、鄭康成、王輔嗣、孔安國諸公，程、朱不可出一言矣。有是理耶，道之一正於至不一處見一，所謂殊途而同歸，一致而百慮耳。流水之爲物也，萬派千溪，總歸於海。適邦畿者，由陸，由山，由水，及其成功一也。內黃令張仲誠於二子有獨契焉，讀傳習錄，與晚年定論，而見其道之一也。二子自當相視而莫逆矣。且於周、程、張、朱，以證之。顏、曾、思、

孟無不一也。由顏、曾、思、孟以證之。孔子無不一也。由孔子以證之。文、武、禹、湯、堯、舜無不一也。仲誠謂余曰：眼前地位已見得有箇不讓堯舜處在是。真知道之一者矣。

韓苑洛洪範圖解序

昔者上天式教。出書於洛。神禹因書以第疇。箕子因疇以衍義。九以綱之。五十以紀之。治天下之大經。大法。燦然明備。古今所謂洪範者也。有宋蔡九峰氏。因律呂之變。悟洛書之旨。乃推數而贊之辭。由占以致其用。始於一。參於三。究於九。成於八十一。而六千五百六十一之數備矣。然禹箕分九疇。而稽疑自爲一事。蔡子統八疇。而並用之。稽疑何也。昔者文王周公繫卦爻之辭。孔子作兩傳以翼之。雖未嘗逐卦逐爻以釋其義。其所以定天下之業。先天下之用。蓋與文、周而同功。是故謂孔子非明八卦不可也。謂蔡氏非明九章不可也。同者理也。不同者用也。君子豈可語用而遺理哉。

跛樵子陰符經輯註序

跛樵子性高潔。無意仕進。甲申後。將以歲貢於廷。去之。乃遨遊於山澤間。復好爲詩。每吟詠以見志。楊猶龍轄豫時。嘗招之同登嵩岳之巔。愛大魏幽勝。遂留連不忍去。余曾過雍邱。讀其詩。知其性情之正。嗣惠予長歌。有負笈夏峰之約。歲己酉冬。方山李子來。復致跛樵遺言。出所註陰符經索序。余與跛樵相慕之。殷者。忍無一言以識之耶。余腐儒也。墳典邱索未能得一卒業。嘗讀上古書。而知刪書。斷自唐虞。誠以世遠言湮。恐未足以垂信來茲。反滋疑義。卽如陰符一書。未詳其果出誰氏所作。而首尾僅三百餘言。實足

括全易之蘊。其微妙之旨。人鮮測識。故多爲隱怪奇異之流。爭相冒竊。而其旨愈隱。跋樵好與方外游。故樂爲抱一守嘿嘿之論。而陰符之說。自以爲可解不可解之間。跋樵解人哉。余題數言以付李生。跋樵子杞人。姓馬氏。字某史。年六十八歲。死於方山。家密令東阿李君高之。私諡曰文節先生。

雲隱堂易註序

前大司馬張湛虛先生。自甲申杜門讀易。著有易註若干卷。逾卒之幾年。甲辰余拜其嗣。先生賢嗣庶常君上。若出其藏本見示。謂余辱知最深。索一言弁首簡。余念庚寅過滄上里第。先生卽告以大易之旨。嗣後幾相過從。輒出易註以示。其中手爲訂竄。已數易其稿矣。先生學易之功。與年俱進。余烏能測其微妙哉。粵稽羲畫創道。而三易迭興。夏曰連山。商曰歸藏。周曰周易。名不同。而變通趨時無兩義也。連山首艮。艮止也。天下事不日新於行。而日新於止。惟其時止則止。所以時行則行也。成終成始之義也。歸藏首坤。坤以藏之。天下事不竭於發。而竭於藏。追藏不密。生趣所以日枯也。故藏者。養也。坤元所以資生也。周易首乾坤。道陰陽也。而陰陽之大。唯天地。君子觀象於天地。而示效法之權於君臣。故八八之卦。多以君臣之義。發陰陽之蘊。以陰陽之消息。著君臣之治亂。苟君臣之道立。因而父子之情親。長幼之序順。而治於門內。倡隨麗焉。孚於聲氣。應求通焉。君臣之道不立。則皇帝王伯之業廢。人心壞。而彝倫斁。邵子所謂人消物盡時也。故君臣者。萬事萬化之原也。先生讀易。而翼之以註意。蓋存君臣也。夫君臣曷以存也。說在孔子之對景公矣。曰。君君臣臣。蓋謂君子於臣。不但存於名與分也。存於義與道焉耳。時有否泰。道無隆污。

時乎道存各盡。則后克艱厥后。臣克艱厥臣。時乎道存交傲。則臣都君僉。君吁臣嘯。或時君焉蒙難。臣焉匪躬。而靖獻不隕於顛隄。或時君務含章。臣曲遇巷。而天澤不倒於屯蹇。其分與義。天地雖剝。而不受剝於天地。人事雖否。而不受否於人事。則翼註之功大也。雖然。猶未盡也。謂存於名與分焉。盤古而後。治亂不同候。而世統未之或絕也。謂存於道與義焉。則詩書所紀。已揭日月而行之矣。復安取夫註。且箋疏傳義。發微旨者數百家。何更煩先生之註。而且欲假註以植天常存人紀也。其將能乎。夫子之作春秋也。曰吾徒託之空言。不若見諸行事之深切著明也。然則是註也。假筆舌以與人共明之。不若著明於身。使天下儀刑之。則先生於名與分。反之心而無慚者。正於義與道得之性者。厚而修之身者。固也。故發而爲言。德言也。豈徒騰夫口說哉。何以明其然也。先生序余日譜。常言之矣。曰。數能奪鬼神。不能奪匹夫之身。惟其見身者重。故不苟其身。曰。天地人相維成世。天地何事。事天地者人。也。惟其視人有權。故鄭重其人。則易之大本已立。故在易亦有之曰。有命无咎。猶是天人參半之論。曰。勿恤其孚。於食有福。便消息生心。造化在手矣。夫學易而至是焉。斯達易之道也。夫斯可與註易也已。

靜谷詩序

張靜谷者。魏子蓮陸之友也。所以稱魏子之友者。以靜谷身遭陽九。不旦歌天。魏子傳其行。收其詩。而欲不沒其友。余之序之者。則以魏子之請。憐其非罪。而求惠之言者也。余按靜谷立功未見。見於忻州一刺。立言未見。見於吟詠數章。然傳稱其個儻有大志。以莫須有而縲囚以死。夫以大志。而致囚死。則憤滿者。

魂魄搏激雷電。蒸鬱虹霓。所以自痛而致人之追痛者無已也。宜魏子之欲共爲表章也。雖然。功業成。言論著。受享已盡。發洩無餘。使憑弔者無足低徊而留連。三覆而悲歎。惟一斑偶見。全豹可窺。寄興片言。襟期畢露。雖一刺而大任可信也。雖數章而富有可該也。搏激蒸鬱。可化爲奠安清霽矣。造物之局。固大而不一人之乘除於其間者。亦各畢其局爾已。竊識其禍緣保孤。然其事不可居爲功。亦不可居爲罪者。第彷彿其事而論之。如李子堅之王成。陳仲舉之朱震。一以乘江東下。各爲異人。陰相往來十餘年。而李燮拜議郎。一以受考掠。誓死不言。陳逸得免。官至魯相。亦謂有幸有不幸矣。然不似程嬰杵臼之皆死也。杵臼以死易。立孤難。先死以爲其易。嬰則待趙武立。乃辭諸大夫曰。我將下報趙宣孟與公孫杵臼。不然。彼以我事爲不成。亦遂死。曰。死於十五年之前。嬰死於十五年之後。咸至死而其事始完。心始遂。古人之視死如飴。有以也。然則靜谷之死。固不必問其爲易爲難。第以此致以此死。方之古人無憾。返之本心無愧。可灑然於九泉矣。魏子亦可慰其友矣。

贈王恢嬰序

甲辰余自蘇門歸里。因憶棄廬而旅者。二十餘年矣。昔之少者已壯。而壯者遂多衰老。至姻譜老友。皆凋落無存。獨王君恢嬰。年滿八旬。尙歸然如魯靈光。神明愈王。健飯強飲。遙望五峰。宛然神仙中人。蓋中之所得者深。不與服食運烝之術比也。君負才多學。有志當世之務。方筮仕臨邑。力卻舊例。歲省民金踰萬。且鑄石以杜後來。閩邑快之。其任魯也。當逆闖盤據。人咸指爲畏途。君毅然單騎自往。所至招撫山寨。獎

論忠義。爭率所部來迎。至則綏徠有法。守禦有方。數郡咸以魯爲歸。今魯志載保城擒僞之事。懷然有顏平原遺風焉。甲申後。補祁一載。遂以醉臥。失迎上官。能歸來。三徑無依。乃攜家入五峰山。蕭然四壁。日唯飲泉憩石。寄情酒杯書卷。絕無慕聲利。援交遊之念。或採藥入林。或彈琴陟嶺。足迹不離山者。今且二十年。子餘祐。以舌畊代負米。嘗奔走千里百里外。公不以榮祿祝子孫。故以束脯作鼎養也。五峰之山。相傳王興五子避莽亂。隱於此。余舊與同人數棲其下。浮家以後。遂不復問津。乃茲山多緣。久借高賢之栖遲。又未嘗有隱士高人之目。昔管邴在遼東。結廬徧山谷。甯見公孫度。語唯經典。不及時事。度以下人。皆安之。原好清議格物。遂致逸歸。夫清議格物。非不美之事也。至不能安其身。若幼安者。真可謂能過人者也。全身善世。而復享大年。陸文定嘗言。士大夫於世法中。唯廉取薄享。可續壽命之原。公生平既得文定壽命之原。而復得幼安處己之道。其獲期頤而享清福。自不待腐儒之喋喋已。

取節錄序

取節者。蓋自名公碩輔。以暨農夫婦女。凡有一念一事之麗於理道。而得於聞見之真者。則急取而錄之也。予竊惟古者史氏之書。其於名公碩輔。非爲國家建大勳勞。捍大患也。不以書。其於農夫婦女。一言一動之根於性。而中於情。則汲汲焉以書。非與名公碩輔之後。獨與農夫婦女之勤也。名公碩輔。賢之鉅且眾者也。事而爲之書。則不勝書矣。農夫婦女。則其賢之微者也。事而不爲之書。則不得書矣。是編也。自癸亥迄今。人不問貴賤。行不問鉅細。只取其一念一事之足色。可以與豪傑而範世俗。則隨筆書之。間亦有

其人素在可憎。而偶有可錄。尤不敢以惡而棄其美。王汝止之言曰。滿街俱是聖人焉。知農夫婦女之所與知與能者。非即名公碩輔之所不知不能者乎。

### 聖學錄序

三代以前。治統卽道統也。三代以後。有治統而無道統。道統於是乎歸之儒。韓子愈原道曰。堯以是傳之舜。舜以是傳之禹。禹以是傳之湯。文。周。孔。孔子傳之孟軻。軻之死。不得其傳。周。程。張。朱。乃所以傳孔孟者也。遞及於明。薛瑄。陳獻章。王子守仁。其最著。已如鄒守益。羅洪先。顧憲成。馮從吾。皆醇儒。溯其源淵。蓋緣明二祖。列宗心學之密。直接一中之傳真。以身行道於天下者也。恐世遠言湮。懼其久而或晦。凡關於道統者。輯爲一帙。名爲聖學錄。使列聖之精神。炳如日星。後之學者。知諸儒之興起。由作君作師者之鈞陶。其所繫豈淺鮮哉。尼山之纂修。憲章爲大程。朱之傳註。表章爲先。某衰年寡識。敢曰表章前聖。然賴天之靈。苟安邱壑。一日不死。一日不敢謂無事。自辛丑元日。焚香手錄。共得若干首。未附臆測。以俟後之君子考衷焉。

### 家禮酌序

家禮酌者。何酌。夫貴賤貧富之不同。器數文物之互異。分之爲各家自行之禮。合之爲眾家共由之禮。此其所以酌也。不驚夫婦之愚。不傷渾樸之舊。如其必不可行。必不能行者。則亦不必酌矣。竊自有儀禮以來。學士大夫之家。相傳爲鼎彝寶玩之而弗用。非天下後世之罪。則禮之文也。繁也。自絕於天下後世耳。

孔子曰。禮與其奢也。寧儉。喪與其易也。寧戚。蓋已心厭其繁。故多方以補救之。而後世之靡也。滋甚。常思之。孔子與子夏論禮曰。繪事後素。則其所先者。可思也。中庸敦厚以崇禮。厚固其所先者哉。禮從厚出。卽三千三百不足盡太素之體。所謂萬殊原於一本。一本散爲萬殊者此耳。先聖先儒定禮。無非教人以敦厚之意。禮行自上。爲公卿大夫設。不得不畫一式焉。使行禮者知所趨。士亦不忍自爲菲薄。易知簡能。乾坤不易之禮。尙忠尙質尙文。皆易簡中之不得不然。今之四禮。雖云廢矣。然天下無不冠不婚不喪不祭之人。名存而實在其中矣。十室之邑。必有忠信。但願行禮者。隨分自盡。不漓其忠信之初。禮何常不易也。不簡也。近甯陵呂氏有四禮疑一書。其簡易有先進之遺。閒嘗竊取其義。夫易知簡能。而天下之理得。更有望後之君子云。

北學編序

學術之廢興。繫世運之升降。前有創而後有承。人傑地靈。相需甚殷。亦後學之大幸也。居其鄉。居其國。而不能盡友鄉國之善士。何能進而友天下友千古哉。以編中所載諸先正。各有面目。其出處隱見。立言致行。雖有不同。要皆願學孔子。不待文王而興之人。故董韓而後。若器之靜修。伯玉學本程。朱克恭。儕鶴。伯順。力肩陳。王因念紫陽。當五星聚東井之際。及其身不免於僞學之禁。陽明功在社稷。當日忌者奪其爵。禁其學。非兩先生之不幸。誠世道之不幸也。我輩生諸賢之後。自待豈宜菲薄。魏子蚤歲掛冠。亟亟以表章前詰自任。則其居心可知矣。



## 洛學編序

余惟洛爲天地之中。嵩高挺峙。黃河蜿蜒。自河洛圖書。天地已洩其秘。而渾龐淳樸之氣。人日由其中而不知。至程氏兩夫子出。斯道大明。人知所趨的。學者於人倫日用。至庸極易之事。當下便有希聖達天路徑。是道寄於人。而學寄於天。蓋洛之有學。所以合天人之歸。定先後之統。闢甚鉅也。厥後廢而復明。絕而復續。學問淵源。天中尤盛。宋興伊洛。元大蘇門。至有明而兩河八都。識大識小。各有傳人。余移家夏峯。每懷思往哲。悵微言之未泯。念絕學之當傳。湯子少負遠志。壯歲卽以病請。孜孜斯道爲己任。十年以來。余見其學日進。而心日虛。洛學之興。端有所屬。因念斯道在人。求之卽得。表前儒以興起後學。如射者之趨的。必期於度。如舟子之涉海。必操其舵。所謂呼之使靈。叩之使覺。千載上下。南北海心。同理同。又何有於洛。以暨濂與關閩耶。蓋學以希賢希聖爲歸。而其最初發願。一直便到希天上。至其中道路之迂曲。識力之偏全。自不能強之同。迄其所歸。川流者以此。敦化者亦以此。自不得有異也。

## 容城縣志序

上谷屬邑二十。容城僻處一隅。右倚郎峯。左繞白河。夙昔懿德微行。率不乏人。而劉靜修先生之理學。楊椒山先生之忠節。不徒光邑乘。而且以照耀天下。馨香奕世。他如山川。城池。土田。壇壝。官師。科目。藝文諸類。歲久勢變。損益不一。無一不待賢使君之修明。以準制而合道。當結繩采地之後。補銀於順德。撥地於阜城。借外助以全本地。而曹州江泰鄰令君清丈餘地。期蘇民困。又除豁莊基墳地。壕塹道路。訖土田變

矣。諸事亦率因之變革。詳核者。或至廢弛防維者。或至蔑棄淳樸。不無澆漓饒洽。漸滋彫弊。升降在世道。休戚在民生。可念也。可志也。玉峯趙使君。起弊扶衰。軫榮獨旌節孝。修城池。革火耗。而又範俗。程士崇舉正學。凡歷年廢興之事。所爲條列而詳著者。無不可以示法示戒。去俚去浮。彬彬乎信史美觀也。然於人物之鼓舞。尤見實用焉。蓋自劉楊兩先王樹幟於先。如靜修及門梁至剛。劉英。李蒙等。他如五經進士。龔居林尖之。胡炳南。一時興起。羽翼不孤。迨其後。疏請從祀之。李希直。張希古。皆其表表耳目者。嗣是一節一長之士。率仰顧前哲。不敢有外名教。使君偏全畢錄。大小兼收。已足深人觀感。又復加意理學。率紳士時習而講明之。將見劉楊兩先生。興起於前。使君同揆於後。闡揚警策。希企往昔。將以昭示後來。撐拄天地。豈特一邑乘之關係已哉。

# 夏峯先生集卷五

傳

## 楊忠愍公傳

忠愍公名繼盛，字仲芳，號椒山，北直容城人。生有異質，然幼遭家難，狼狽孤苦，難以殫述。八歲卽善牧牛，時窺里塾諸生，揖容吟誦，心輒愛羨之。欲從讀書，兄以其幼不可。繼盛曰：「幼任牧牛，乃不任學耶？」又告於父，始得受書。一日客至，無酒，沾於市。塾師出對云：「無酒是窮主。」繼盛對曰：「有兒爲名臣，又同學者，嘗窺師出，作陣戰之戲，師歸，衆皆藏匿。師出對云：「藏形匿影，繼盛應聲曰：「顯姓揚名，蓋終身之品業。於童年不勞之矣。」十八歲補博士弟子員，二十五歲舉於鄉，三十二歲成進士。是年爲嘉靖辛未，初授南吏部驗封主事，剔宿弊，立章程，吏曹肅然。考功郎鄭曉一見，謂諸僚曰：「此人心志氣節事業，將來不可量也。」因告以居官守身之道。時關西韓邦奇爲南大司馬，負重名，公從受樂三月，而得其數。又踰月而得其神。邦奇則舉天文、地理、太乙、六壬、奇門、兵書，悉以授之。會諸寮有講學者，繼盛又相與講論，或謂此輩多立黨，作僞沽譽。繼盛曰：「道者，吾性分所當爲，可逆億人之僞而不爲耶？嘗自言予於死生利害義利之關，見之甚明，皆講學之力也。」登泰山題句云：「志欲小天下，特來登泰山。仰觀絕頂上，猶見白雲還。」末序云：「向謂泰山爲高。」

也。今知其特高於地耳。山之上高固無窮也。蓋真見得學無止法如此。陞兵部車駕員外。時邊事方亟。而部曹承習上下文書爲支吾。大不愜。會仇鸞議開馬市。部議推繼盛行。繼盛具疏言馬市決不可開。然旣以遣臣。臣言其不可。是避難也。謹條陳五事。一必令俺答愛子入質。二令盡還掠去邊氓。三議開市後。別部落入寇。俱責保約。四欲平馬價。分爲三等。五欲整兵以備戰守。毋玩忽以生鹵心。堂上官聞之曰。如此則馬市不得開矣。乃別遣主事行。而繼盛乃上疏斥其十不可。五謬。一謂忘天下之大仇。二謂失天下之大信。三謂損國家之重威。四謂墮豪傑向用之志。五謂懈天下飭武之心。六謂開邊方勾通之門。七謂啓百姓不靖之漸。八謂長外蕃輕中國之心。九謂墮遠人狡詐之謀。十謂貽後日難繼之禍。苟能修備。何藉於羈縻。謬一。旣和矣。馬安用之。且彼安肯以壯馬予我。謬二。互市不已。必至朝貢。朝貢而中國之竭財益甚。謬三。中國開市。能盡給其衆乎。不給。則不能無入掠。謬四。如曰佳兵不祥。譬癘疽毒日內攻。而憚用藥石可乎。謬五。上三閱之曰。繼盛言是旨甚溫。而鸞有揭帖進。乃下八大臣會議。鸞寵方盛。八人皆中樞附和。許開市。遂逮繼盛獄。訊謫狄道典史。故事謫官者不事事。繼盛乃日求民利病興革之疏。洮水以灌園圃。開煤山以省薪芻。狄道應徵糧草。官無冊籍。獨聽書算生操輕重。乃集書算生科。綜之往時飛詭之弊。盡絕。又鬻乘馬及室人服飾。買民間最重賦地二千畝。做古井田意。割授諸生。使畝入粟。以給筆札及婚喪之費。上官每以易褐一事爲地方累。繼盛力禁之。乃止。創建書院一區中。三楹爲道統祠。祀歷代帝王聖賢及各名儒。聚諸生肄業。其中番漢生童數月後。各知揖讓敬長上。其父兄亦忻然曰。楊公來何遲。

也比去。哭送者千餘人。明年遷諸城知縣。豪強斂迹。盜賊屏息。尋遷南戶部主事。甫到任。卽陞北刑部員外。未至都。改兵部武選司員外。繼盛念一歲四遷其官。思所以報國者。於是以元旦日食。具疏劾嚴嵩十罪五奸。十罪謂壞祖宗之成法。竊人主之大權。掩君上之治功。縱奸子之僭竊。冒朝廷之軍功。引背逆之姦臣。誤國家之軍機。專黜陟之大柄。失天下之人心。壞天下之風俗。五奸謂上之左右。皆嵩之間諜。上之納言。皆嵩之鷹犬。上之爪牙。皆嵩之瓜葛。上之耳目。皆嵩之奴僕。上之臣工。皆嵩之心腹。未有或召問二王等語。疏入。復下鎮撫司訊問主使。並引用二王之故。繼盛曰。今廷臣皆嵩黨。孰爲主使。奸臣誤國。能欺皇上。必不能欺二王。蓋二王年幼。常不見上。奸臣必不防避。至親莫若父子。故幸上問之二王。必能言之也。拷訊楚毒終不撓。又明。日下錦衣衛杖一百。依詐傳親王令旨律論死。方詣衛受杖。有遺以蝻蛇膽者。繼盛笑曰。椒山自有膽。何必蝻蛇哉。談笑赴杖。屢死復甦。太息曰。忽然而死。忽然而生。如睡又醒。人之死生。固甚易也。獄司憚嵩拘繫甚固。繼盛自剖腐肉。去膿血。楚甚而泰然安之。王比部世貞爲奔走求救。王司業材詣嵩爲力解。嵩陽爲許諾。而爲子世蕃及門客所持。材流涕爭之不得。而繼盛竟死。年纔四十歲。前一日猶據榭牀。自著年譜。作家書屬身後事。神氣安閒。如無事時。赴義時。尙吟二絕句云。浩氣還太虛。丹心照萬古。生前未了事。留與後人補。天王自聖明。制度高千古。平生未報恩。留作忠魂補。至隆慶初。贈太常少卿。諡忠愍。妻張宜人。抗疏請代夫死。語甚壯。爲嵩所抑。不得達。長子應尾官。順天治中有直聲。仕至尙寶寺丞人。謂椒山有後云。次應箕卽獄中。與都御史王遴約爲婚姻者也。

歲寒老人曰。先楊爵下獄時。浦鉞周天佐輩。猶相繼上疏救之。至忠愍下獄。同鄉親友畏禍絕迹。獨王繼津結婚獄中。王鳳洲以周旋獲罪。二公之外。蓋寥寥也。嵩之積威比黨。噫甚矣。然公之受禍。雖慘而天之所以成公者實深。明代忠臣多矣。其轟烈震動天地者。公之外。曾有幾人。方其從苑洛受樂。既得其數。又得其神。徧習天文地理。奇門遁甲之書。猶曰。此儒者餘事也。與同人講論。則一一力行。皆曰。椒山可語進道矣。至狄道。則築道統祠。以鼓勵士子。嗚呼。使公而不以忠死。豈不足爲道學之宗哉。

趙忠毅公傳

忠毅公。名南星。字夢白。號儕鶴。北直高邑人。卓犖負大節。悲歌慷慨。輕死重氣。萬曆甲戌進士。除汝甯推官。陞戶部主事。調吏部歷考功郎。澄汰流品。皎若冰鏡。常靜坐篝燈。精心參酌。有蟲巢於耳。繭成而不自覺。以不畏強禦。忤時相。削籍。行人高攀龍抗疏。分別忠佞。極言閣臣不當陰除異己。鋤善類以空人國。遂謫去。助教薛敷教疏諍。亦謫。南星林居三十年。以名教爲己任。海內清名之士。淹久不用者。其應和益廣。而羣小疾其厲。已爭相標目。遂譁然以高邑爲質的天啓初。起廢籍。以大常少卿。歷左通政。太常卿。工部右侍郎。陸左都御史。有申明憲職諸疏。內察力絕情面。作四凶議。以處大猾。尋改吏部尙書。有再剖良心等疏。推高攀龍總憲。楊漣副院。左光斗僉院。鄒維連夏嘉。遇程國祥等入銓。曹魏大中輩。相次枋用。羣小滋不悅。會高攀龍以考覈回道。御史礪閣之私人崔呈秀。於是羣小合謀。嗾魏忠賢曰。東林必殺公。忠賢怖且恚。所謂東林者。蓋指南星與攀龍。皆願憲成東林黨也。於是假會推事。盡逐東林。爲魏廣微。陳九疇。

等誣陷。與攀龍同罷。閣臣孫承宗疏。謂兩臣去而出於上意。則皇上之獨攬。未必協天下之公令。去兩臣而出於惡兩臣者。將內結外援。天下盡入其牽籠。而大患立至。不報。明年以張訥及梁夢環疏。削籍提問。追奪誥命。懸坐贓一萬五千兩。戍山西代州。子濟衡。戍陝西莊浪衛。甥王鍾龍。陝西永昌衛。父子甥各居一城。而子與甥以撫按郭尙友。馬逢臬。宿恨笞責。慘毒備嘗。丁卯冬卒。戍所崇禎御極。贈太子太保。賜祭葬。謚忠毅。南星爲文章。疏通軒豁。能暢所欲言。不拘尺幅。有宋元名家之風。至於排擊朋黨。伸雪忠憤。抑塞磊落。萬厯間推公爲首。其詩瘦勁有風致。文集若干卷行世。

歲寒老人曰。神宗朝天下恬熙。小人近倖。孽芽其間。一二君子奮起。下位搢柱國。是而朋黨之論始出。所謂一二君子者。公與無錫顧公其尤也。景逸舉進士。實出公之門。當公被逐。景逸以疏救謫。顧亦以言事罷。羣小譁然。目諸公爲東林質的。於是璫兒媼息不盡。殺諸公不止。嗚呼。朋黨之禍。至於斯極矣。公實與之終始。公於魏南樂。素以父執自處。無少假。南樂因同姓嚴。事璫致揆席。公愈菲薄之。或納賄肆關說。執不可。一日踵門請見。門者曰。休矣。將脫幘而寢。南樂怒詈而去。又嘗短李淮撫於公前。公曰。若忘修吾以戶部郎上疏救若翁耶。南樂慚退。日與璫比。而謀嚙公。

### 鹿太公傳

太公名正。號成字。侍御豫軒公長子。太常伯順公父也。侍御宦游。正拮据家務。一意以明農課子爲己任。故侍御得無內顧憂。太常未嘗北面一塾師而業就。生平勤儉持家。卹人之急甚於己。當厄之與甯直無

難色。恆慮人有難盡之言也。表弟劉正心。以一言之諾。養其妻子終身。爲之娶婦者二。嫁女者二。蓋慷慨好施。自其天性。與人不設城府。不岐面背。臨事嶄然有斷。性簡樸。聲色服御。去之若浼。惟以孝友節義誨人。并以自律。侍御寢疾。躬侍湯藥。衣不解帶者三年。嘗一夕數起。假寐几榻間。微聞侍御欠伸狀。卽屏息而俟。早夜禱瘳。頭鬢爲白。其侍母夫人。日夕依戀。太常常一再迎養京邸。席未煖而歸裝已束。曰。奈何戀游子而牽堂上老人遠思也。七十歲居母喪。猶寢苦食淡。哭泣如禮。終身之慕。殆謂是與。篤念手足。與弟直友歡。垂白無間。鰥居日。太常欲擇一侍媵奉起居。正曰。若以而翁爲苦耶。吾自覺無不足處。風雨蕭然。彌發嘯詠。性不解飲。而雅好客。流連下榻。丙夜不倦。客或請少休。笑謂君豈以老夫爲醒眼。君輩舉爵。吾汨汨亦若有酒腸也。拈棋三百。拉一二同調。禮礪其間。竟日對壘。並忘勝負。制詞有云。溪山寄傲。覺海鷗猶有機心。木石與居。笑雲鶴仍無定性。得公神矣。恩命三錫。年登八旬。每出入安步。閤中卽往返百餘里。亦止一僕一騎。無異布衣時。曰。吾幸未憊。庶幾與里閤故舊。遇諸塗。何可使其引避。而轍迹畏人。將無挾兒輩尊寵於車上。儻哉。有司至門。恆踰垣以避。歲請鄉飲。始勉一赴。後絕不往。孫化麟中辛酉解元。製一褐袍。太常自塞上歸。一裘爲壽。正復嚴戒之。嘗謂生不能挽流習。而席祖父以自張。藉子孫以自奉。此其人殊堪嗚噓。蓋以高風古韻。追蹤爲王彥方。陳太邱。逾四十年。鄉里蒸蒸。何論家庭間矣。至天啓中。璫禍起。綱羅密布。一時如左。魏。周。諸君子。皆太常密友。方其遭禍。三家子弟賓客。絡繹江村。謀所以爲左右力。正挺身周旋。不計禍患。甚至釀金應比。聲聞長安。旁親者代爲公危。正不顧。第曰。老人籌此已熟。不知命。



無以爲君子義。豈肯惜一身。爲吾子蘭籍辱。崇禎己巳之變。范撫軍入援。公湊粟五百餘石犒師。嘗割腴地數十畝。代合族貼軍。其仗義急公類如此。當太常發金花落職。復從高陽相國督師淪水。人皆爲正慰且危。正獨掀髯長笑曰。臣子不當如是耶。持祿養交。非吾子事。且如先侍御抗言大節。何迄太常殉難。猶毅然曰。得其死矣。世受國恩。可借此以報九廟之靈。亦復何恨。觀此則其自處與爲子處。無論富貴於生死又何如也。正嘗擁五世於一堂。人倫之盛。海內寡二。後以化麟爲父。叩闈悴死。終不勝鬱痛以歿。海內聞而悲之。乃某猶不能無感焉。某交伯順四十年。於公爲猶子。乃不督過。若以孺子可教也。歲時風雨。譚塵碁枰。對某必色飛。卽忿怒激切時。某徐出一言。無不立解。不知何以得此於公也。後子孫相繼殞歿。公病以及屬纊。某無一時不侍左右。屢欲爲傳。顧感痛不能搦筆。久之始聊述其概如此。亦承公之素命也。

### 鹿忠節公傳

鹿善繼。字伯順。號乾嶽。直隸定興人。祖久徵御史。以諫言譴。父正。逆閹時。傾身急左。魏諸公難。所謂鹿太公者也。善繼端方謹懿。歸然如斷山。少以祖父爲師。小章句。薄溫飽。讀王文成傳習錄而契之。慨然有必爲聖賢之志。每與同儕談說經旨。曲折盡變。動中妙理。同儕謂其能記憶也。善繼曰。只是要醒得。如何要記得。醒得如何是我。則由我而周程而孔孟而湯文堯舜。無不覲面以相質。六經四書。皆我註腳。夫豈有疑於心乎。自是而論交日盛。萬厯丙午舉於鄉。癸丑成進士。與吳郡周順昌。襍被蕭寺。鷄鳴風雨。以節義相期勉。選戶部山東司主事。職鹽法。與同舍郎某。爬搔利病。洞悉源委。丁內艱。毀幾滅性。歸而遠邇來學。

者。舍不能容。隣居僧院。幾無閒室。服除。補戶部主事。署廣東司事。遼左方闕餉。善繼輒發金花餉。遼神宗震怒。得謫。一時省臺諸忠直大列。無不爲誦言者。解官歸。門人日益進。每拈尋樂大旨。爲及門談柄。光廟御極。首復其官。典新餉。廉直介立。清操絕俗。尋改兵部職方主事。題覆章奏。時遼陽初陷。中外洶洶。善繼爲大司馬草疏。請逮某。斬某。以伸國法。會王象乾以大司馬行邊。因用廢弁與職方郎耿如杞左職方持之力。首揆葉福清有司官不得違阻之旨。善繼上書。福清曰。邊疆之壞。由於債帥。中外諸貴人入其債。而請求於職方。職方自愛其官。不得不徇諸貴人之請。今幸得一憂國奉公。不徇情面之人。反奉不得違阻之旨。胥天下以職方爲市。永無不債之帥者。自此一言始。勿謂能違阻之司官爲易得。勿謂去能違阻之司官爲小失也。福清謂其刺己也。怒己而屈服焉。歲壬戌。孫高陽以閣臣理部事。請真逃臣熊王於法。善繼舉手加額。迄高陽自請督師。善繼請從。適吏部缺司官。羣欲挽善繼。善繼不可。曰。軍中無苦樂。但問所從誰。相公一日在師中。某當一日在幕中。高陽嘗云。予居東拓地四百里。鬪退七百里。無一不出伯順經畫。而口不言功。功亦不及。僅以久次轉員外。陞武選司郎中。而忌高陽者。百計阻之。遂與高陽同歸。家居四年。學力日充。痛除將就。冒認影響浮游之病。而一言一動。觸處逢源。說約一編。日與同人諄復。口授崇禎初。御起爲尙寶司卿。無何陞太常司少卿。管光祿寺丞事。細大兼營。到處修明職掌。未三載。復請告歸。先是神廟末年。高景逸。馮少墟。鄒南泉。講學京師。同志者邀公聽講。旣而閉相戒不言。朝政不議。職掌公曰。離職掌言學。則學爲無用之物。聖賢爲無用之人矣。遂不往。後數年。與景逸偶。過於朝房。辨析疑義。景

逸恨相見之晚。具疏薦佐高陽。丙子秋七月。東兵破定興。是時公移疾江村。無城守之責。毅然於望風奔潰。臣節之掃地也。援兵登陴死守七日。而城陷。東兵挾刃逼公。公不爲動。遂死之。當事者以殉義聞。詔贈嘉議大夫大理寺卿。廕一子入監。讀書專祠。賜諡予祭葬。生平應事接物。一意認真。學以認理爲主。而言理卽在事上。故其言曰。讀有字書。卻要識無字理。則其自得可知矣。所著有四書說約。認真草。三歸草。若干卷。行世子化麟。舉辛酉鄉試第一。伏闕頌父忠。不勝喪死。

歲寒老人曰。公之死也。以節著。人謂足見公。而予四十年交公。知公之志。知公之學。方與公定交。忠愍祠下。固慨然有殺身不悔之意。登第後。遺周忠介詩有云。寰中第二非吾事。好向椒山句裏尋。猶津津以節義共勵。至榆關四載。出入戎馬之場。病苦死生。只家常事。蓋認理明徹。故能全體通靈。孫高陽哭公云。予向覘伯順之一窮通。齊得喪。忌毀譽。渾成虧也。乃今親覘其不二死生乎。此言蓋得於目擊心識之餘。意密神傾之後。公真聞道之士也歟。恤刑郎胡向化疏云。善繼生爲理學名臣。死爲封疆著節。視居城中。城破而不得死者不同。時以爲知言。

### 范文貞公傳

范景文。字夢章。號質公。北直吳橋人。萬厯癸丑進士。初授東昌府推官。獄多平反。時值歲饑。條荒政。躬自賑恤。全活以萬計。己未擢吏部郎。一時正人多所推用。甲子逆闖竊柄。景文典選一疏。詞義侃侃。大略言天下仕路。舉國如狂。嗜進如鶩。母亦衝鑿之地。先自不清。而欲其恬漠寡營。詎可得乎。竊念除者有歲格。

其久近不得而私也。遷者有資勞。其深淺不得而私也。特擢者有勳望。其高下不得而私也。今與需次諸臣約一行請託。臣不能爲之諱。又與同事諸臣約一聽請託。一願需次諸臣勿爲臣等諱。以天地人才爲天地惜之。朝廷名器爲朝廷守之。天下萬世是非公論與天下共之。人還其人。我無失我。此臣心可自信。時魏忠賢黨羽視吏部爲外府。疏出大恨之。景文一日閱選人姓名。齒舌本噴血漬地。類中惡者。遂請急歸。父永年爲南甯守。謝事居南都。豫告所知曰。吾子必不爲貂豎。作奉行吏。勅家人掃徑以待。未幾果歸。丁卯起太常寺少卿。不赴。崇禎戊辰冬。再推補。己巳七月。擢右僉都巡撫河南。拯溺救災。所至問民疾苦。鼓中州之士氣。以壯國威。旣而邊人不戒。薄我京畿。景文聞警。卽率師勤王。宗社借之以安。上使人慰勞之。加兵部右侍郎。團練通州。壬申內艱歸。甲戌起南右都御史。掌院事。乙亥陞南兵部尙書。凡四年。廉辨以率僚屬公嚴。以杜干請。南額兵八萬人。堪戰者不滿萬。景文蒐軍實。詰戎備。部曲壁壘煥然一新。嘗謂非戰無以爲守。非守江無以守陵。守京非守江北。無以守江南。此守江南之大局也。以池河衛關山。以關山衛滌浦。此守江外之大局也。宿重兵於廬。游兵出英六之間。東據鳳泗。西應皖楚。南控江北。扼淮。此守江北之大局也。景文以世道安危爲己任。故爲綢繆之計。壬午八月。轉北刑部尙書。十月。改工部。甲申二月。入政府。拜東閣大學士。海內望治甚殷。爲日無幾。天下事已不可爲矣。逆闖犯京師。景文三日前。卽不食。城陷號泣拜闕。投井死。或以初入相。而魏通州。陳井研。據其上者。非同心之人。未能行其志。有遺憾焉。生平重氣節。篤友誼。當周忠介順昌。以忤璫逮。景文出橐金二百。急其難。金至而忠介死。詔獄。景文復給。

其孤寡。孫文正、承宗、鹿忠節、善繼，皆氣誼最篤。兩公殉難後，爲梓其遺集。景文所著有味元堂稿、南樞志、大臣譜、武功編、體仁編、開心劄記。有子早卒，遺文淪喪，實錄亦多缺。遺贈太傅，諡文貞。歲寒老人曰：甲申三月，神京陷，宰執而下殉難者二十餘人，畿輔人與其難者六，公其首也。余與公相去僅三百里，未得識公之面。然公在南樞，曾有檄聘予爲北司空，又欲疏薦於朝。余雖未就，實於公有知己之感也。窮棲他方，未能得公全傳，殊以爲恨。然日月經天，有目共睹，固不俟余詳言之矣。

### 金忠節公傳

金鉉，字伯玉，先武進人，後籍順天。少有慧質，讀書目數行下。天啓丁卯，順天鄉試第一。明年成進士，乞教授爲讀書地，授揚州教諸生。先德業而後文藝，燕居言行俱有規格。諸生懷懷事之若舊宿。轉國子監博士，辛未陞工部主事，命修理安定四門軍器。時中官張彝憲總理戶工二部錢糧，令建公署，侍郎高弘圖罷去，憲向諸司官索儀註。鉉疏力請止之，謂廉恥不可不維，浮費不可不惜。公署旣建，勢必強司屬匍匐於獨踞之庭，卽諸臣矯矯自好，當亦不爲內臣屈。而其中保無暮夜多慚，寡廉鮮恥，以自行其私者乎？不報。彝憲上任，移檄令兩部司官行謁見禮。公具監臣移檄非體一疏，極言彝憲亢顏昧心，妄自尊大，以皇上廸簡之臣子，而令其謦折僂，將置自有之堂，屬別行誣妄之儀。臣委質聖廟，自矢無玷，斷不敢匍匐刑餘之庭，致罹交結之條也。得旨：各官遇有職事相關，自當禮見，其餘不必通謁。彝憲益銜之，適部差抽分杭州，鉉告病回籍。彝憲以驗放火器炸損，誣參，竟落職。鉉有自訟一疏，閉門讀書，究心物理性命之學。

悉取五經四子書暨諸儒語錄。研思博覽。毛詩、春秋、周禮俱有解。於易更有所窺。有悟卽筆記之。嘗言善易者不譚易也。劉宗周爲少司空。嘗就鉉論學。與陳龍正、史可法、朱之馮、道德經濟。互相勸勉。鉉貧約。自甘所居。不蔽風日。中外有以起廢言者。鉉絕不問。讀書之外。輒靜坐。每謂人曰。人若不學。學則未有不日進者。性至孝。父病衣不解帶者數月。辛巳。父卒於丹陽。號泣奔喪。僅存皮骨。癸未。當路交章推轂得旨。起用銓部。卽欲啓事。鉉以服未闋。力辭。甲申二月三日服除。四日卽補兵部。巡視皇城。職司禁門守軍。先是。皆中使虛冒。鉉下令嚴禁。代者懲不到者革。中使畏其剛直。相戒勿犯。逆闖勢迫。陷大同。鉉疏請撤宣府。中官監視。恐於中掣肘。不無僨事之虞。端任撫臣。必賊騎不敢窺宣也。不報。未幾。內監迎賊。宣撫朱之馮。城頭盡節。鉉聞馮殉難。擬抗疏。請聖駕南遷。以時迫不果。謂其弟曰。宣鎮陷。都城不守矣。我死分也。惟無以處。母目不瞑。弟欲奉母隱。母不允。曰。我受皇恩爲命婦。決無生理。宅中井可入也。城陷。易朝服。拜母而哭。曰。兒職在皇城。他非死所。趨至御河。邊賊已入。鉉指賊大罵。解牙牌付長班劉元。向闕拜。元牽衣不釋。鉉髮指目裂。以手捶責衣冠。躍入水中死。母章知鉉殉御河。卽投井死。妾王氏從之。弟諸生鯨。城陷卽自縊。爲家人解救。痛母兄殉。後數日亦投井死。鉉屍不可復識。弟鏡僅認髮與網。殮以衣冠。葬於御河邊。贈太僕少卿。諡忠節。母贈恭人。仍建坊旌表。鉉殉難時。年僅三十有五。生平弱不勝衣。訥訥然如不出口。篤志力行。不蹈文人之習氣。節士之矜激。處困能亨。在險能動。而義之所在。有千萬人不可奪之志。眞所謂學道人歟。有宋儒四子合刻行世。歿後仲弟鏡梓其遺集八卷。

歲寒老人曰。余甲戌初識公。公被放里居時也。座談之際。每事嘗思退云。易三百八十四爻。未聞有退凶者。閉戶十二年。讀書窮理。甫起官。卽以致命遂志。人遂以爲節士。不知理學忠節。未始有二。不窮理而甘蹈白刃者有之。未有能窮理而不能致命遂志者也。吾鄉理學而忠節者。公與鹿伯順也。鹿之學近陸。王公之學守程。朱至居敬。致知四字。又能發程朱未發之蘊。聞朱勉齋嘗與公論學。曰。盡人倫。體天理。公極服其知要。公之自得深矣。

### 賀公景瞻傳

崇禎甲申二月二十二日。逆闖至獲嘉。原任武德道兵備賀公同妻恭人王氏。妾李氏。張氏死之。公名仲軾。字景瞻。衛輝之獲嘉人。四世祖雄。以典膳起家。雄生春。春生國清。國清生盛瑞。字鳳山。以進士歷官。參議爲營部郎。以清直著。是爲公父。仲軾少而近癡。嗜讀無他好。當重九日。鳳山令家僮攜壺榼。導之出游。酒榼食設。一無所顧。及歸。鳳山問故。曰。偶拈一題。遂忘登高耳。夙有疾。鳳山深憂之。仲軾三年居宿於外。絕葷酒。疾得瘳。癸卯二十四歲。舉於鄉。庚戌成進士。甫釋褐。具疏批鱗。忠直之氣。中外欽仰。初授陝西醴泉令。邑故刁悍。胥作奸。力清錢糧諸弊。分較秋闈。稱得士。以外艱歸。讀禮嚴肅。戶外事。一無所問。服闋。補江南青浦縣。青冠紳藪也。書牘無虛日。誓不以法假人。江南故有投獻之弊。因下令曰。田歸紳士。役仍本人。請者紛紜。概謝不應。徵比錢糧。不煩鞭箠。訟牒。卽令本訟人。刻日追呼。監司臺使者至。不飾廚傳。供帳。文學孝秀。季有試。月有會。漕粟官民屯。悉貯於倉。粟糶雜責在民。耗抑勒責在軍。軍與民兩得其平。暇

修樓櫓。葺橋梁。爲海忠介新祠宇。禮逸士陳眉公。在諸要人右。庚申陞刑曹主事。具疏訟父鳳山冤。先是鳳山爲繕郎。經營乾清。坤甯兩宮。力塞漏卮。杜絕請託。不二年。以銀六十八萬竣役。實省在庫銀九十三萬。其嗣任繳奏。前費以一百二十萬。皆取美秩去。而鳳山竟爲異己者中。以考功法。仲軾據實奏辯。得旨下部。雖爲忌者所抑。然公論已明。癸亥遷員外。隨陞本部郎中。戶部太倉老庫失銀主者。直參前任湯道衡。奉旨逮訊。仲軾以茫無確證。具疏駁之。湯得釋。是年冬。遷鎮江守。治郡事一如治青浦。巡漕御史駐鎮。運船不敷。漕使者欲分派諸運船。弁借口船重。恐有沈溺。仲軾曰。該弁恐妨私貨耳。運糧美差也。但下令有敢任洒派餘米。卽行更易。領運漕使如其言。無復有作梗者。先是黔中用兵。募鎮弁有能運餉至黔。酬以衛印指揮。戴天錫先往竣役。而衛弁持印不讓。出令者置不問。仲軾曰。如此何以信後。立主前議。後鑽刺者多方蚤緣。屢借上官爲奧援。仲軾具文力爭曰。天下事。遇難苦。則能者職其勞。遇安逸。則狡者享其利。才知之士。所以吞聲。而天下事。卒至不可收拾。甯直爲一戴弁地耶。上官竟不能奪。丹陽姜志禮以忤魏黨罷歸。一日部劄逮趙冢宰南星。招中并無姜應勘問。而尾後止書姜志禮三字。院檄下道行府提勘。仲軾曰。姜係四品京堂。不奉旨。誰敢擅提。具文回道。道嚴駁。仲軾曰。固知不行。提必得罪。然以比獲罪。所不敢辭。若今日奉時局。異日者。以擅提四品京堂加罪。罪將何辭。擇禍莫若正。守之不移。丁卯陞陝西甯道兵備。因爲璫賢私人所銜。劾奏草場變價。有負廠臣急公之意。鑄級不果行。辛未家居。作春秋歸義。至諸撰論。翻駁古今成案。獨伸胸臆所欲言。壬申寇警。日追捐穀百石。爲修築置械器。癸酉三月。寇薄城。



日宿學宮。爲自靖之地。忽有武德之報。所屬二十城。交際一絲不受。道有三營兵馬。痛懲積弊。厲精振刷。嚴沙汰。利械器。信賞罰。清占役。積其銀。爲買馬置火器。後敵薄城。所賴以制禦者。卽其所備也。御史袁化中。同諸忠死逆璫。久未葬。仲軾捐金。爲襄其事。未幾聞曹郎有指而訾議之者。仲軾卽拂衣去。歸家課弟姪。閉戶著書。甲申二月。寇氛相逼。所在納款。仲軾撫心太息。比僞官到縣。欲言賊死。姪行素曰。旣無官守。何如詣闕直陳。死君父前。因攜家抵石駝莊。曰。恐路梗不能達。死小盜手無益。復歸至合河。僞官要入城。仲軾大怒。擲帖於地。曰。賊敢見我乎。謂弟姪曰。道二仁與不仁而已矣。出此入彼。事無騎牆。一生功力。在此一日。吾今得死所矣。復到巨柏莊祖居。具衣冠北向拜闕。繼登塋。辭祖考。題齋壁曰。吾家自典膳祖以來。受朝廷恩厚。及今一百七十餘年。國家一旦有急。不以死報。何以對吾皇。何以見吾祖考。况河北千里名區。豈可無一殉義之臣。妻妾輩。余不忍手刃。願從死者。共彰大義。隨吾同墓。不願者。亦不强也。卽登樓。呼童取酒。與弟姪輩談笑自若。復手書。今日方知。賀景瞻促弟姪下樓。扃戶縊於東間梁上。北向對君也。妻恭人王氏。西向從夫也。妾三人。俱縊於西間梁上。以次東向侍主也。是日天忽晝晦。烈風折木伐屋。人以爲忠憤所感云。歷三晝夜。顏色如生。僞官亦驚歎羅拜。時年六十五。里人私謚爲文貞先生。所著有柏園初草。冬官紀事。春秋歸義。八卦餘生等集。共八十四卷。子敏猷廩生。入太學。先公卒。嗣孫振能。能讀書。後中丙午科舉人。

歲寒老人曰。余嘗敝列邇來忠臣。隕身於魏璫者。自楊忠烈左忠毅而下。一一可指數也。甲申天子死社

稷致命遂志者。范文貞倪文正而下。一一可指數也。然楊左諸公。被逮下獄。范倪諸公。國破君亡。義不容苟。生勢無可逃遁。只有一死以報君父。若公既身在林泉。微箕靖獻於身前。夷齊稊骸於事後。亦無不可。乃矢志就義。妻妾同殉。急遽不違禮。殆與劉蕡山若合一符。是可謂善處死者矣。總之。仗節殉義之臣。須具一知中之愚。仁中之過。方得淋漓足色。彼仁柔者。悠悠不斷。知巧者。規避多端。一瞬失之。終身莫贖。從來坐此咎者。正自不少。公策死之道。可謂仁至義盡矣。

張公元美傳

元美名羅俊。直隸清苑人。性端毅。尙氣節。居恆以綱常名教自勵。幼娶雙瞽女。敬好無間言。不置媵妾。諸生時弟羅彥蚤通顯。羅俊淡甯自守。刻勵古行。崇禎丙子。魁於鄉。絕不事干謁。不阿權貴。事不苟一時之便。凡三黨事。悉倚之。癸未成進士。以觀政給假家居。甲申。聞逆賊李自成。擁數萬衆。入太原。破甯武。由居庸而北。所過城邑。紳吏皆望風降。羅俊憤謂弟羅彥曰。吾等何以報國恩。事急矣。當堅守保定。遏賊勢。以蔽京師。不則甯以死殉。固臣子之義也。賊將劉宗亮犯畿輔。過河間。將嚮保定。羅俊數月前。傳檄首倡。效死勿去之義。忠憤之氣。感動全城。乃分雉堞。嚴號令。守泱月益堅。至三月。李建泰兵入保定。其卒爲賊來說降。羅俊守東面。手擒之以示衆。賊自城下曰。京城已陷。守城何爲。時京城陷已五日矣。羅俊不聽。鼓舞益奮。賊攻益急。至三晝夜。賊焚傷死者愈衆。忽建泰與賊應。西南城陷。賊乃入。羅俊猶力守。親擊一賊仆地。扼賊之吭。啃其面。竟嚼一耳。血淋漓。口角間大呼曰。我乃明進士張羅俊。汝等所罵霸城者。吾弟羅彥

也。賊擁衆亂刃死。年五十一。子仲庠生。適他出。聞倡守。來奔共禦賊。城破。卽投井死。年二十六。歲寒老人曰。公甫成進士。卽以身殉。爲諸義烈冠。忠矣。至孝於親。友於兄弟。於瞽婦相敬無違。禮門以內。何雍穆也。丁丑公車與子論交。侃侃多氣誼。斯人也。殆所稱完名全節之士乎。

### 韓氏二世祖傳

宗法之廢也久矣。本是同根。漸成行路。此仁人孝子之所爲撫膺而歎也。韓子參夫。銳志復古。宗法講明。獨詳欲於山中覆草爲堂。以奉其祖考。使子孫世世守之勿墜。可謂特立獨行之士矣。余知參夫力學久。意之所是。舉世不能撓。大都所言所行與所取之人。事惟期於盡倫。心惟約於勿欺。後盤桓於南國者數年。從高景逸先生遊。其學益礪。今過余。以其二世祖考妣傳相託。竊聞古來賢人輩出。人重其賢。併重其先。爲賢者之祖。聖人輩出。人尊爲聖。併尊其先。爲聖人之祖。是所謂守身不辱。光及祖考。彼大奸大兇。不獨身爲戮民。而且令人追恨。其所自出。則先世之或榮或辱。祇在子孫之猛爲修耳。雖有祖德不能庇。不肖之子孫。卽無前功。豈能掩拔俗之後嗣。是子孫之託廕於祖父者。關猶淺。而祖父之借衍於子孫者。權更大耳。仁人孝子。宜何以爲情耶。韓氏世代已遠。生平顯晦。俱不可知。參夫之言曰。不敢以不情之事。誣先世也。但記姓名而已。嗟乎。今之爲誌狀者。強爲粉飾。盡塗面目。子孫亦何貴於此哉。韓初真定之藁城人。後遷宛平。祖有諱四公者。配馬氏。序以呼之。四公乃行四也。是爲參夫之二世祖云。

### 仇孝子雪廬傳

孝子名雲慶，字騰宇，雪廬。乃劉參議兌，因君雪夜居廬，題以贈君。後人因而稱之者也。始祖貴乙，自揚州移新安。五傳名鐸，是爲孝子。父母卽以孝聞，載入邑乘。孝子家固貧，事父母曲盡子職。父性嗜棗，君每遇輒懷歸以獻。母年老多病，每夕焚香籲天，願損壽以益母。母病尋愈。萬麻辛卯，父母各九十歲相繼終。孝子痛幾死而復甦。葬之日，結草廬於墓側。時沍寒，雪深尺餘，寢苦枕塊，哭奠如禮。負土築墳，手植松柏，足迹不入城市者三年。墓之西北隅，號曰鬼市。與廬僅隔數武，夜半悲風四集，怪鳥弄舌，野狐呈態，燐火往來籬下。孝子絕不爲動。三年如一日也。邑令羅君啓先，聞而敬之，親造其廬，具文當事，得旨旌表。居廬時年近六旬矣。禮稱不毀，孝子不飲酒，不茹葷，不御內，倍嚴於少年。時親知有勸之者曰：君無嗣，且乏應門之童，煢煢家室，何以爲情？孝子曰：我正以二親肉未寒，而恬然家居，安妻妾之養，此則情之所大不堪也。遠邇名公，贈詩百餘首，皆焚毀，不以示人。然不求名，而名益彰，無問遠邇，孰不知雪廬孝子哉？孝子被旌在萬麻乙未，府道申請，部院查覆，孝子絕不知劉君兌，仗士民公義而成其事。嗣巡撫王君紀，月給米一石，巡道解君經邦，月給米四斗，當不減劉殷七年之粟矣。孝子溫雅平曠，行不苟合，言無夸矜，無少長貴賤，莫不驩然相得，而孤介之性，偏與淡泊爲親。嘗連日不舉火，絕不向人道，並無顛頽色。其自得深矣。居庠數十年，以色養二親，不求仕進，然善誘人，從游者多所成就。復善書，老而彌精。七十生子，九十見孫，一日無疾而逝。壽九十三。子爾顯，女一，適花似錦，亦以苦節聞。

孫魯章名含。高陽人。愷陽先生第四子也。余初遇於鹿伯順座上。以其貴介。常若避之。含獨於僦伍之中。偏若就之。伯順謂余曰。相國衣鉢。端在是人。不可棄也。因而定交焉。丁丑與君仲兄鈔同上春官。時蘇奸民張漢儒。以烏程意臚錢虞山風影事。投揭長安。且上疏已得旨逮矣。鈔固善虞山。日夜思爲之地。時伯順子化麟。亦以伯順殉難叩關。得其揭帖一冊。卷首有假曹司禮令其上疏之辭。余謂鈔與化麟曰。決非司禮所願受也。二子曰。孰可以爲司禮語者。余因以其事語中貴。劉惟善曰。人借司禮殺人。而司禮不知君不可不知也。劉素自好。每慨然有志於古之璫而賢者。因問其詳。余出漢儒揭帖示之。惟善亦曰。此定非司禮所願受也。翼日。惟善復來曰。昨所言。已因人悉之矣。繼而茅元儀亦有字遺余與鈔兄弟。謂虞山旦晚且至。屬其蚤爲計。鈔令含就商於余。爲言欲與化麟同謁馮涿鹿。余曰。謁涿鹿可。而增一人則不可。蓋兩相國家。報謝往來。情意稠密。不妨相機婉言。參一人則易涉門而矣。以江村與涿鹿雖年誼而無交情也。時虞山有人過張果中。含急就果中探動定。遂謁涿鹿。涿鹿坐語移數十刻。殊不爲動。但頻呼茶。且曰。僕於東林諸君子。不遺餘力。諸君子肯一言相容耶。含曰。不然。左浮邱先生墓銘。家相國乘筆新參之力一段。東林諸君子。大家感激。有字稱謝。何謂無一言相容。誌文具在。歸卽呈攬。蓋虞山因新參一段。有字來屬。削之。含遂借言謝之耳。涿鹿遂毅然許爲之地。適虞山將至都。含與涿鹿逆於三家店。含從虞山入都。遺余字曰。晤涿鹿坐語數十刻。始得其首肯。奉教而來。幸不辱命。曹司禮以惟善之言。與涿鹿相合。遂疏謂投揭。自有接本衙門。在何嘗令之上疏。漢儒枷死。旋逐烏程。是役也。脫虞山之阨者。涿鹿也。而作

涿鹿之合者。含也。含具幹略。能詩文。負過人之才。而未得表見於世。六載榆關。風浪艱險。贊襄之力爲多。卒從其親殉城而死。君子曰。含可爲孝子矣。

鄔孝徵傳

孝徵。名萃。號慈菴。湖廣石首縣人。二歲失恃。乳母哺養。繼母視如己出。甫成童。以孝聞。家饒無私蓄。與其弟藩。友于甚篤。由是父母愈歡愛之。初就外傅。卽以聖賢爲必可學而至。其師孝廉陳續宗大異之。後陳仕於燕。萃從遊。遂入籍。充博士弟子員。試輒高等。食廩餼。督學滄嶼。左公較士。萃與史道隣齊名。一時稱得人。萃因交史。共朝夕。二十年如一日。性好學。尤好誨人。執贄請益者。戶常屢滿。若死難宣。府朱之馮。出其門。其他可知也。所與遊亦皆名俊。北如金伯玉。南如管待菴。咸素稱善。十困棘園。兩經旣售。而別意淡如也。居恆兢兢力學。其題齋聯云。一失足爲千古恨。再回頭是百年身。以此自警。待菴見而嗟歎之。又輕財好義。多方濟人之厄。如荊州運糧指揮馮衍祚。以七十艘糧抵京。沿途消耗幾四千餘石。所司嚴比。危在旦夕。萃與渠僅一識面耳。傾橐周之。前後仍貸五百餘金。無何衍祚病故。萃復親爲收殮。送其骸骨。並僕人雷性南歸。所有債負。置不問。岳州人張正昇。有孝行。曾割股愈其母。萃高其行。因與爲友。後正昇居京師。缺費。貸萃百餘金。未收券。正昇忽聞母訃。以金未還。不敢言歸。萃曰。君遭此大變。豈可爲負債而不奔喪耶。正昇感泣而別。其義氣慷慨類如此。崇禎朝。司訓新安。日與多士講習不倦。學宮傾圮。煥然新之。萃有傲骨。遠識。晚更得力於禪。邑令某委以糧務。初厭其瑣屑。繼而邑令督責其書役。萃曰。學博豈司倉

吏耶。憤然納其冠服求去。邑令謝過留之。甲申僞官李邦興假郡同巡行地方以射利。郡縣不敢問。萃一見謂諸士曰。京棍也。吾目中閱此熟矣。語侵之。邦興不敢逞其威。果至寶坻而敗。鼎革之際。萃鬱鬱不得志。竟以此致病。沒於學署。子孔彰南歸。不及視含殮。義僕鄔知文理喪詳慎。闔邑感德。請從祀名宦。方余寓渥城。與萃僅隔一壁。時時促膝語中懷事。居然有一夕千載之意焉。數年後。其門人蔣生如蘭。每語其行事。未嘗不泣下沾襟。則其教澤入人之深可知矣。嗟乎。人亦惟其生平耳。志固有所不得行。方君與史管金朱諸君子遊。其志可知也。而戾於時。及其鬱鬱不得志。臨期嗚咽殆矣。而不忘諄諄之語。是其志諒不可沒也。余用述其梗概。以告君鄉之賢士大夫。使知君生於楚。非徒生。死於燕。非徒死云。

### 殷仲淵傳

仲淵名淵。直隸鷄澤人。少負奇耿介自持。性孝友。事母唯唯。訥澁若不出口。於父則侃侃辨論。必理至心。響然後已。曰。慈幃家務。食飲而已。過庭則得失成敗。名行關焉。何可不辨。於兄更效切劘。知無不言。言無不盡。父兵備關南。死非其罪。淵兩疏鳴冤。不報。未幾。闖賊席捲秦晉。延及三輔。淵投劍號曰。卽不死。留此身以待用也。今先子之讎已矣。苟且與賊共生。奚爲。四月。聞國變。謀諸邑衆。爲先帝發喪。痛哭文廟。作討賊之檄。以義自憤。時自成僞令秦植。猶假狐擁衆。手刃淵於明倫堂。時五月十一日也。歲寒老人曰。殷仲子真義士也哉。死而非義。未免沾名。且以傷勇。仲子父死。以闖賊陷兩藩。主兵者畏罪。假違令失道。卸罪於人。以這己罪。則仲子於賊。不獨爲殺君。且殺父。故以頸血寒逆賊之膽。豈暇計成敗。

禍患哉。作詩明志。諭意於其妻。令絕食自盡。且問兄意云何。兄曰。吾未嘗受祿於朝。且嗣續未立。如先人何。仲子曰。此借口。弟不及此矣。噫。予固敬其言而悲其志。仲子真義士也哉。

李完一傳

三台爲元儒。劉靜修先生風化之地。今雖代移世遠。而流風遺韻。尙存巾裾韋布間。余五十年。嘗往來其鄉。猶及見劉鍾所先生。習聞三戍堂之盛。嗣後表表蔚起者。不可一二道也。吾友完一李君。實生其地。少馳驚於文場。長浮沈於宦海。老而困頓寂寞。且竟以他鄉死矣。迹其生平。不爲卓絕崖岸之行。不慕皎潔奇異之名。惟以忠信文章。孚里閭間。無論少長賢愚。皆曰。吾完一先生之人之文也。今雖死。言念夙昔。寔可傳也。君姓李氏。諱衷實。完一。其字也。先世口外小興州人。永樂間奉詔內徙。居新安之三台里。世業儒。君生而聰穎。讀書過目不忘。族兄孝廉孔從。以學行爲鄉所推。君師事之。銳意進修。靡間寒暑。十七歲入邑庠。每試輒高等。大有聲諸生間。鹿忠節公倡道江村。君與族弟童。負笈從之遊。忠節公嘗向人曰。完一可言文章。蔭繩可言春秋。蔭繩卽童也。天啓辛酉。左忠毅公光斗。督學畿輔。覃恩當選士。充太學。得君文。深嘉賞。爲得人慶。都尉王君慕之。延爲弟子師。高陽孫文正公。見其文曰。此非庸人也。君有至性。事父母。言動唯謹。居喪哀毀。若不勝。母有兄弟。貧不能自存者。君資其生理。與別駕劉勃然友善。劉病歿。母老無依。君迎養。久而不衰。張茂才某病劇。以子類錫託君。君視之若子。類錫得爲諸生。又能鼓舞人文。一時知名士如崔九圍。李順昌等。皆師事之。後進之士。執經問業者。履嘗滿戶外。順治初。授徐州通判。官雖卑。公



道所在。能毅然任之。大參張君重其品行。不待以屬禮。嘗以官評相屬。君不敢稍涉己意。用巡方薦。陞荆門州同知。職專漕務。飛輓獨先。有嫠婦張逋。官糧鬻女三十金以應。君傾俸金代償。使爲母子如初。視荆山篆。力絕羨耗金。不兩月。一歲之正供。民爭告完。去之日。荆父老皆流涕攀送焉。陞四川順慶府通判。至卽以老病乞休。歸途跋涉重繭。僅一蒼頭兩蹇而已。次漢中。囊洗不能前。遇參議董君應徵。素知君。遣力送之。里門家居七載。食貧力學。以病卒。年六十九。君生平不治生人產。以教授爲業。家計用裕於義所在。必樂赴之。當庚辰歲凶。君出粟數十石爲粥。以濟饑者。容城蕭姓。貸銀三百兩不能償。遂焚其券。在順慶所屬彭溪。令師覺先聞艱不能歸。君解驂贈之。後覺先爲保定同知。君從無一字相干。恬淡靜穆。無他嗜好。獨癖吟誦。至老愈篤。嘗爲詩文。走筆數百言立就。不深思。不苦吟。見者皆服其敏。自無機心。絕未嘗以詐僞逆人。無少長皆信之。詩文稿多不存。

歲寒老人曰。完一與予弟啓美同爲忠毅公所選士。交好且久。當忠毅被逮時。予與鹿太公釀金急其難。君首出硯耕所得金應之。君殆讀書。而知大義者也。故其學問領袖一方。然竟戾於一第。雖老年稍稍見用。終未大有建豎。人皆惜之。

### 李逸士傳

逸士名童。字蔭繩。新安三台里人也。少有俊才。師事鹿忠節。伯順爲高弟子。甲申後。歲貢在隄。逸士投牒於學。攜妻子移居成安。父子以教授生徒爲業。越十五年。困頓而死。諸子自傷貧窶。不能歸觀。泣下洑瀾。

余謂之曰。汝知而父之志乎。老死他鄉。卽所謂求仁而得仁也。夫何憾。諸子錄其生平。哀乞立傳。知逸士者。莫余若。烏辭。祖夢龍歲貢廷試第一。行誼爲宗黨所推。父祚熙。邑庠生。勇於爲善。子四。長埜。中萬麻。己酉鄉試。仲臺。季堅。逸士其叔子也。從伯兄孝廉學。循弟子職。孝廉病。侍榻晝夜不解帶。壬子十九歲。入邑庠。未幾。父母兄弟五年之內。相繼而逝。逸士榮榮一身。拮据悲苦。幾不知有生。然棺衾含殮。猶能如禮。家由是益落。唯讀書益勵。每至午夜不休。丙寅食廩。督學袁公署其牘云。索解欲窮其原。撰辭直透其頂。賞踰常格。甲子問業鹿忠節於江村。丙子忠節殉義。逸士號啼數日。曰。天奪吾指南也。傳習師學。較侍師時。倍爲真切。三台爲靜修先生設教地。逸士於書院中建茅屋三楹。日誦讀其中。祠宇荒圯。倡同人捐資。營理。丁亥攜家南下。至廣平之成安。愛其風氣醇樸。遂於柏寺營居焉。每爲人講解忠節。說約一編。遠邇士執經問業者無虛日。肥鄉賀應旌造廬而訪檄諸士。有云。新安李先生。學衍陽明。鉢傳忠節。吾儕所當心服。而儀型之相從者五十餘人。己亥過蘇門新鄉。郭士標傾蓋投歡。令子姪問春秋。居一載。忽病。病中猶講論不輟。稍瘳。歸成安。意欲終老。蘇門忽病不起。親友問病者。有憂色。逸士笑曰。出門以來。死於溝壑。吾志也。今復何憾。逸士少豪舉。酒後悲歌。有燕趙風。中更家難。益自刻勵。嘗留心經濟。間習兵家言。迨其後。邱壑自適。嗜學愈篤。嘗云。老而不學便衰。故隨地接引。倡師學於趙衛之間。門弟子隨錄問答之言。曰。讀書歸要。喜談節義事。激昂感慨。意常有餘。每與地理家談。議論風生。若有獨解也。卒年六十有八。友人杜越誌其墓。子姓姻譜。詳載誌中。三子體天。合天。明天。皆奉逸士命。從余遊。能讀書。繼父志。

歲寒老人曰。傳稱逸士者。以其不係籍於士。而欲遺之。遺所以成其逸也。遺其名。正欲逸其心也。夫世或以顯達而死。或以阨塞而死者多矣。而求之於心。果逸乎否耶。士必先遺聲利。而後能逸。遺聲利矣。稍有憤激於貧賤之念。而心已爲貧賤所役。是亦不得逸也。逸士當出門時。固以不忘溝壑爲志。卽死貧死旅。心安往而不逸哉。蘇門以貧旅死者。有新城張果中。以熹宗恩選士。四十年不謀一官。困窮阨塞以死。蠡縣諸生彭之燦。恥爲苟食。竟餓死於公和嘯臺。逸士嘗往來蘇門。過兩人之墓。低徊憑弔。不忍去。嗟乎。是可以知逸士之心矣。

### 郝涿川傳

郝公名勳。字孟立。世居涿之房樹村。友人汪湛一題其廬云。月窟天根。眞隱處。水田山色。小江南。人故稱爲涿川先生。中嘉靖丁酉鄉試。絕迹城市。有司罕見其面。刺史岳憐其貧。常寓書以示請託。勳若不喻其意者。岳極歎其可仰而不可卽。有某以大獄株累。貽銀器一案求脫。勳弗顧。友人謂是人。誠非其罪。爲之排難雪冤。豈非濟物之一會乎。勳乃翻然援之。而終不納其酬。素與同郡田夢鶴爲貧賤交。田後爲中州副使。贈以廐馬。勳力卻之曰。我有朱游之車可乘。正無需此。其孤介類如此。家雖赤貧。見寒者則解衣相贈。性猶和易。有惡少嫚罵於門。勳曰。醉耳。絕不與較。萬厯朝銓司張特疏以賢良聞。力辭不赴。爲舉人四十八年。卒年七十二。著述多遺失。僅有川上存草。勳曾促膝老聘。割南園地爲三清廟。人遂以方外異人目之。姚江謂儒佛老莊皆吾之用。勳殆有用於老莊而不爲老莊用者乎。素與孫淮海。羅念菴爲友。輓章

有云論理學而返本窮源。淮海亟推爲獨步。闡性術而摛懸剔隱。念菴亦幸其同心。可想見其生平矣。歲寒老人曰。烹廟以後。其隱也易。神廟以前。其隱也難。蓋璫餼薰天。逆闖肆虐。道中之貧賤。人知甘之。若河清海晏。士子一登仕版。遂自謂係籍聖賢。以安富尊榮之時。能不去非道之貧賤者。曾有幾人。涿川四十八年。無一念忘溝壑。非塵視軒冕。芥視鍾駟者。能如是乎。余恨與公生不同時。伯順長。余數歲。猶及見於侍御公座上。亟稱爲拔俗之士。乃身無血嗣。國史不及。家乘久墜。豈公之高蹈於生前者。并欲晦名於後世耶。敬採所聞。而爲之傳。以俟君子考實焉。

馬玉壺傳

玉壺名潔。家世定興。警愚先生仲子也。性倜儻。喜風節。諸生中咸推重焉。與鹿忠節友善。余識潔以忠節。余以長子與潔結姻也。亦以忠節。忠節爲定興十三場籽粒地數千頃。土瘠賦繁。民不堪命。五年心力。請於上。得折徵減地糧之半。此永賴之利也。潔始終勸勤之。而潔實未嘗有尺地。天啓時。逆賢大修皇極殿。耶車於定興。涑水新城。人心鼎沸。客氏邑人子。其母佞佛。潔授意於其門僧。轉告車盡捐。邑令缺。委署者。魏黨也。令所私。余州判視篆。饗養放橫。勒日完糧。商人衙役暨驛馬夫。悉索見面禮。抗者笞幾斃。潔倡言於諸搢紳。達之當道。仍率闔學具呈。委署者怒。挾璫勢。欲中傷潔。潔使聞於璫之要人。以懾之。委署者不敢動。余遂逐。己巳之變。羣小乘機搶掠。邑令某盲不修守禦。惡聞警報。百姓棄城走。富商等語大俠王福安曰。人心洶洶。勢不能自有其財。倘能防衛。願與平分。遂立約逸去。事平。衆欲薄酬。王怒曰。以性命易財。

詎可食言。衆無以應。謀於潔。潔謂王曰。爾禍不遠矣。驚問故。潔曰。危亂時。而衆以財託爾。非慮他人。卽慮爾爲禍端耳。今事既定。若以酬爾之物。爲興訟之資。爾能操其必勝耶。奈何。以身外物。喪生平俠。感悟。立焚其券。不索酬。邑西南爲巨馬。易水河陽。匯流於要津。建橋梁二。每歲秋。葺夏拆。吏胥叢奸。居民苦之。新城令沈君迅來攝篆。會里猾以百金。夤緣董其事。沈疑之。商於潔。潔暢言其弊。令拒營謀者。另舉廉幹二人任之。省民力而成功速。復下令拆橋。時封貯廟中。乾者令民以濕易之。歲爲例。民大稱便。丙子春。部牒飭守禦。勅附近郡邑。城增高。補厚。踰三月者。罪不赦。邑令羅君四達。懼違限。造廬相商。潔同紳士誓於神。晝地估料。不階官吏。令士紳分任。百姓鼓舞從事。不兩月告成。是年秋七月。東事急。邑令病。守禦弛甚。太常鹿公善繼。家居江村。潔與工部郎范文源。走江村。促之入城。誓以死守。城陷。潔與鹿公俱死之。繼配田亦以死殉。嗚呼。潔一諸生耳。生以忼慨磊落。雄里閭間。終以大義激烈而死。生平雖困於遇。而能隨事利濟。爲德於鄉。鄉之人無賢愚貴賤。莫不知其人。亦可以無憾矣。子四。爾植。爾標。爾材。爾楹。爾楹。終身不應試。鰥居四十年。不再娶。從余遊。能勵志於學。不愧其父。潔死逾三十年。余今且八十有四。猶得吮秀穎。紀生平。竊以爲潔慰云。

### 王念南傳

念南。名介。初名三錫。字任軒。念南其號也。直隸曲周人。父屏南。文學獨善。性剛直。不諧於俗。其鄰居宦也。垂涎其產。先以厚資餌族人。以及屏南。屏南堅弗售。以是怒族人。遂共羅織之。屏南得禍不懼。卒全所居。

宅其他蕩然也。時介甫數齡，親當其阨，誓取科第以慰屏南。父子俱無他技巧，困貧窶特甚。屏南棄世，而母氏獨存。或日止一舉火，嗣又有欲得其宅者，時雖貧，賣田宅猶可作鄉間富人。親友亦有勸之者。介曰：吾棄產不能見先人於地下，且命苟貧，金入篋中，一夫胙之走矣。吾何有？母氏亦成其志。自失怙，至登賢書十八年，皆茹苦日也。介性至孝，不能具甘旨，以和顏怡志悅親，其不爲溝中之瘠者幸耳。戊午舉於鄉，母年且老，性嚴急，常一言不合，輒喝斥。介從無幾，微見於色。時紳宦多鮮衣怒馬，介獨十三年無帛衣，布袍草履，不識者不知爲孝廉也。西鄰張老，憐其清苦，以鑲銀器一盒，鄉間一小莊餽介。介弗受。蓋時之僅見者，爲定輿論課士之暇，一編自娛，著任軒隨筆，終任未嘗一字干縣令。直指吳公阿衡訪時政，介以三策上，首薦介。俸甫三年，遂有東平州之擢。刺東平，仍服學博公服，補易白鷗，帶以銀箔鍍之而已。東平素號衝疲，加以兵燹之後，比屋流亡，野多曠土，徵收羨餘，卽庸補正項聽訟，款言化導，從無金矢之入。士民相安，有來暮謠。當道不惟不以責交際，反有止用東平水一盃之語。無何遂病，投劾而歸。歸則家猶徒四壁立也。常謂人曰：吾生平無快事，惟守產不愧先人，居官不負科目，差足自慰耳。未半歲而卒。年六十一。從祀鄉賢。三子俱諸生，體元體健，體行五孫，三諸生，端方，郅兩進士，鄰，鄭承先啓後，以文世其家者，仲子也。

歲寒老人曰：念甯司鐸，范陽嘗於鹿伯順座上，習其風旨。刺史東平，僧鹿太公走孔林，復過署中，信宿。迄今四十餘年矣。體健訪余蘇門，執贄而修舊好。且鄰，鄭連步南宮，懷懷守先世清白，迪後人儉素，學莫切

於是亦莫大於是。因念公厚德發祥，而余叨夙緣，難忘舊好，遂爲之傳。

### 尹芝僊傳

芝僊，名暉，字爾毅，山陰人。宋儒尹和靖公之後，幼讀書好弄，十餘歲聞人彈琴，遂悉心其學者十年。性嗜山水，愛諸名勝，徧遊三吳八閩，淮楚瀟湘之間，印證琴學，不啻如性命。崇禎間，天子明琴理，延攬天下善琴者，遂官武英殿中書舍人，從上彈琴，仁智殿上出御製五建皇極曲，令譜之。中有洪範、風雷、雨暘等詞，滾拂劈刺，曲肖其情致，澎騰其要渺，上不覺失笑曰：「僊乎僊乎，卽賜號曰芝僊，刊之印章。」一時傳爲盛事。數年多所獎賚，鼎革後，芝僊浮蹤山岑水湄，無以爲家。晚年愛蘇門山水，遂止居焉，間爲詩歌以見志，刻有徽言秘旨若干卷行世。

歲寒老人曰：芝僊，蓋今之逸客也。余子若孫嘗從學琴，因思聲音之道，出乎性情，通乎神明，達乎國家，天下明季，上欲以解阜致天下之和，蓋不得於君臣之間，將以身乎取之，禮樂百年後，興事若迂而心則苦矣。語云：一人知己足不恨，芝僊以一布衣受天子知遇，洵非偶然，故甘就困辱，追述前曲，俾傳後世。若芝僊者，亦可謂不負此知遇矣。

### 湯母節烈傳

湯母，睢州湯子斌之母也。母當崇禎末年，逆闖肆虐，所至攻陷城邑，母義不受辱，罵賊死，逾七年，提學使李公震成，檄守吏建祠，睢州春秋致祭。又十二年，巡按御史李公粹然以疏聞，表其閭曰：生員湯祖契妻。

趙氏節烈之門。子斌由翰林院檢討兵備潼關。贈母恭人。君子以有斌爲之子。故又曰湯母云。母唯名族。父尙敬。遂學篤行。與湯壘齋公交好。時祖契方幼。與論經義。奇之。遂許字焉。母生而端淑。有志操。讀書通孝經。及列女傳。年十三喪母。褚哀毀過甚。十七歲歸祖契。言動舉止。皆準禮法。壘齋公夙疾。母治藥。唯謹。病亟。目不交睫者四十餘日。及歿。衾殮皆身經理。必誠必信。親黨謂母嫻於禮。湯固世胄。後家漸落。堂上甘旨之需。常鬻簪珥市之。歲祿躬咽糠粃。子斌見之。戒勿聞大母。恐損老懷也。祖契性豁達。喜賓客。常儲美醞以待。每出遊梁宋間。數月不返。母持家務。姻戚歲時問遺不廢。素善病。一室蕭然。見者難堪。母獨怡然。崇禎庚辰。李自成擁衆數十萬。縱橫開歸間。兼之頻年荒旱。飢民相率從賊。母嘗對祖契歎曰。身爲婦人事有不測。斷無苟全之理。姑老子幼。請以一身謝夫子矣。爲女治嫁。斌年未弱冠。亦爲受室。明年壬午三月。賊潰西華。先令斌從伯父賁皇。讀書城北村舍。倉卒聞亂。城閉不得入。母向人曰。遣之意固有在。來則俱死。無益。爲語吾兒。善自立身。勿忘母平日言也。未幾城陷。遂整襟經於梁。家人解之。復入井。家人又出之。母怒曰。若教我偷生乎。賊至而不死。非節也。死不以時。非義也。時賊已環至。露刃相向。母厲聲罵賊。遂見殺。顏色不變。賊歎息羅拜。時崇禎十五年三月二十五日。年三十七。後遇忌辰。陰雲四合。悲風夜鳴。居人傳其期比寒食云。

歲寒老人曰。余來中州。詢甲申大難事。輒知母節烈狀。嗣兩河人。往往稱斌之賢。則又知母能教子。而更著其節也。斌自狀其母。有曰。斌初就外傅。歸必課所讀書。一日偕同學出城外。抵暮而歸。母端坐不食。切



責之曰。汝年少。志趨未定。而樂嬉遊。吾將何望。嗟乎。湯母。可謂教子明大義者也。雖古斷杼惜陰之訓。何以加諸母。生平大節。於此徵之。斌之學術。於此基之矣。歷稽往史。獨怪馬遷不爲婦女立傳。而班固亦復略之。自漢中興以後。范史綜其成事。搜次鮑宣妻以下。凡若干人。而魏晉唐宋諸史。皆效法焉。若湯母者。事舅姑以孝。相夫子以義。且成其子爲名儒。復致命於喪亂之日。追配前休。不爲尤烈耶。嗚呼。此不惟可爲內則。世之鬚眉男子。自稱問學。所遇稍殊。輒爲改易者。視此亦可自勵矣。

### 李節婦于氏傳

祁州古立節地也。民淳俗美。宋有橫渠張子。明有曰仁徐子。司教化於上。鄉之人有鄭秀者。堅節烈於前。故士人知重節義。至閨中之婦。夫逝而守節終身者。踵相接也。乃余所聞李節婦于氏。則又其最著云。氏定州衛籍。而家於祁之曲堤村。父名一躍。母吳。幼嫻女訓。十五歲歸李君。好古稱好合焉。門以內。肅然有秩。門以外。靜不聞聲。無奈琴瑟中斷。好古竟賣志沒。氏二十九歲。遺孤艾蘭。纔三歲耳。水漿不入口者數日。誓以死殉。父母泣諭曰。昔人稱死節易。立孤難。徒引決爲快。汝志畢矣。其如藐孤何。氏悟曰。吾不能取。李氏孤兒長養成立。使延一線。吾何以見夫子於地下。乃強存視息。上事孀姑。下撫稚子。飢而食。寒而衣。勞悴千端。艱苦萬狀。父母憐之。微諷以他室富貴。則悲號不食。曰。如不諒予。誓有一死。敢二其心乎。父母初以愛生憐。繼以懼生敬。無復再爲是言矣。久之。家計益窘。至不能具饔飧。挈子若女。就養外氏。而付其姑於叔弟。歲時歸省。甘旨不缺。至祭祀必躬必潔。勿之有悔。外氏向固以懼而生敬者。數歲相依。不忍言。

勞後自外氏歸。孤兒漸有成立。乃一意訓讀。不丙夜不休。書聲與機聲相響答。又時取兒課文觀之。視所點竄爲憂喜。慷慨義勝於慈愛而能勞。以故孤兒弱冠成饒士。甫壯登賢書。氏爲之喜。加一餐。繼而泣謂艾蘭曰。爾有今日。爾父之目可瞑。爾母之心稍慰。然非外氏。豈能有今日耶。艾蘭泣受教。蓋至是良人有母。氏爲之拮据敬養。始無愧爲李家婦。良人有子。氏爲之鞠育撫摩。始無愧爲李家母。良人有子宜教。氏爲之訓誨啓迪。始無愧爲李家師。良人有子宜家。氏爲之內外經營。始無愧爲李家督。氏之所以隱忍不死。視畢命一旦。凍餓人之父母。而斬絕人之後嗣者。其難易何如哉。迄今艾蘭向予追述往事。兩目欲斷。寸心幾折。慟尙殷殷也。氏守節三十八年。享年六十有七。其生也任重道遠。其沒也體受歸全。此於功令宜旌。艾蘭謂時尙可待也。意若謂母三十八年孤燈夜雨。茹鹽食淡之苦。揭日月而行中天。節已成矣。豈復以旌不旌。遂有顯晦哉。子與云。守身爲大子。謂婦不守身。無以成其節。臣不守身。無以成其忠。子不守身。何以成其孝。孝子也。忠臣也。節婦也。一而已矣。乃婦人之貞。多見於荒村冷巷。而臣子之節。則難概望於顯士通人。此非習詩書秉禮義。峨冠博帶之士。反出閨闈女流下。蓋陰陽消長之數。所由來遠矣。從古治日少而亂日多。君子少而小人多。明示陽之不能敵陰。故陰曰羣陰。陽曰孤陽。激而言之。至謂舉世皆婦人。滿朝皆婦人。總歎冠而笄者之不可勝數。得不借笄而冠者。以爲維風砥世之機。艾蘭舉壬午孝廉。今且十年矣。生不及識父。又未得以祿養母。恐此後居高食厚。當必有恫於心者矣。予南行過祁。撮其大者。爲之立傳。其詳有刁子包所誌之墓文在。

耿烈婦王氏傳

烈婦王氏。太康諸生耿於彝妻也。壬午三月十八日。闖賊圍太康城。氏卽以死誓。及城破。囑子帝德曰。我死必矣。汝僅得存。當讀書自立。我死無恨。賊至。遂罵賊求死。賊首曰。貞婦也。釋之。氏乘間投井。已折一股。羣賊復撈出。氏罵益厲。賊因斷其舌。絕其頸。老僕婦郭氏相從。目詳其事。氏死之四日。帝德往收其屍。頸斷口邊。血漬猶新。顏色如生。覆於淺土。後有人移其屍於他所。其家未知也。忽白晝其姑白若氏。憑之者。爲言死時。得快其志。第骸骨暴露。令深掩之。驗之果然。氏中書王永隆次女。死年三十二。歲寒老人曰。予生平聞死節婦女多矣。而烈氣貞心。如王氏者。不概見。其罵賊求死也。志已素定。至於斷舌。斷頸。不稍屈。而魂魄猶以得死爲愉快。噫。懷烈丈夫。到頭未免失其素節。一巾幗婦。乃剛決至此。壯哉。予爲傳之。他日青史定有特書其事者。

孫節婦張氏傳

順治己丑夏六月。土寇乘容城。孝廉孫君爾禎之子。諸生立德遇害。其妻張號泣護以身。引頸受刃。賊義之。不忍殺。張復投井。水淺得不死。遂髡兩鬢。不粒食者三日。旣又縊於窗。衆奔救得甦。張自是始以撫孤爲念。孝廉家固貧。張承以勤儉。躬自織紉。凡子衣食紙筆。率皆機杼所經營。一日以課業稍違。祖訓張泣請受杖。衆稱其賢。姑多病。晝夜榻側無少怠。庚子姑復患病。適氏亦抱病。猶侍左右。一夜嘗數起。執燈滌牀褥。姑食息離婦不歡。明年姑病愈。張一病遂不起。舅姑咸稱其孝。其子瑾。髫年入邑庠。能知母之節。千

里外乞一言。余與孫氏交。蓋四世矣。心儀孝廉之高風。而重其子婦之節孝。急爲弔管。且孝廉君有女。適同邑宋茂才琮。十九歲稱未亡人。今已十五年矣。撫孤館。將有成。與張以雙節稱里閭。益見孝廉刑于之化。他日司風化之責者。當以余言爲徵也。節婦父張嘉遇。山東招遠知縣。守節時年二十八。卒年纔四十一。歲寒老人曰。國家旌節之典。三十歲後守節者不與焉。守節不過五十者。亦不與焉。史遷不爲節婦立傳。班固節婦傳。亦在蓋棺之後。孝廉女故附張氏傳中。張氏之節。以孝著。張氏之孝。以子能有成益養也。惜天不假以年。後有論者。當以完節爲張氏重。不必以天年爲張氏憾也。

劉母葉孺人傳

孺人古杞葉氏朝棟之女也。年十歲。許同邑劉公時志之子允。時兩家皆殷厚。比數年。時志物故。產日落。至無錐立。葉之老嫗。密告孺人曰。阿姑席富腴。而劉最貧。豈能同事貧賤耶。孺人掩戶自搗。誓不欲生。以爲出自父指也。父聞急救之。鞭老嫗以明意。及笄。延允於家。氏自甘蠶繭。勤紡績。佐夫子。又能治生。積歲月所餘。頗不仰給於外氏。天啓丙寅。允忽感寒疾而逝。時孺人年三十有六矣。遺四子一女。呱呱一室中。伶仃孤苦。莫我顧者。嘗撫其孤泣曰。未亡人所恃者。望若輩成立耳。聞孟母三遷教子。後成大賢。吾劉氏之先。未聞有起家詩書者。以堪輿家言卜牛眠。襄允葬事。復與弟諸生登。視諸子所就。各授之業。令鴻業鴻聲。就外傳。餘荷鋤。壟畝間。當此時。田賦婚嫁。所入不給。恆貸於權子母家。後索積逋者曰。若何不鬻此產。尙望有興盛時耶。母聞而益勵諸子。卽室無升斗。而延師愈篤。歲丁丑。闖氛肆虐。茶戮州邑。孺人預戒。

子婦曰。世亂矣。貧賤尙可苟全。衣飾悉宜棄去。敗絮敝衣當各儲之。迄賊至。所過殺傷最慘。獨劉氏闔門免於難。孺人復謂諸子曰。賊焰方張。避地當亟。棄家來河朔。卜居輝邑之南郭。雖流離貧困。以十指爲子婦先。令諸子服賈糊口。教鴻聲未嘗一日廢學。己卯得補博士弟子員。孺人方冀漸慰夙志。辛巳四月。忽聞弟登。被賊執不屈。罵賊遇害。孺人哀痛致疾。竟致不起。輝廣文劉君復古。束芻柘前。手書柏舟冰操。以表其節。諸子復歸櫬。合葬於杞之南柳莊。年五十有三。里人服其德。甲午鴻聲特恩選拔。癸卯舉於鄉。孝友力學。孫曾繁衍。天報母節。當昌其後云。女適汲邑李新基。與鴻聲同選。

歲寒老人曰。古稱內行不踰閭。劉母之賢。何較著若此哉。余來蘇門。鴻聲從余遊。每每道母氏懿訓。至是屬余作傳。余嘗謂哲婦隆家人之道。貞女亮明白之節。徽美可述也。而遷固咸漏焉。若劉母者。所值不天。能成己之節。復成子之學。邁迹前人。妻道無成而代成有終。母之成劉氏也大矣。且蘇門一片地。堯夫不爐不扇地也。元有趙仁甫。姚公茂。許平仲。寶子聲諸公。皆盡室來移。蓋中心所慕。別有應求。母一巾幗流耳。當家室之忽摧。痛機杼之是屬。三遷之訓。爰卜蘇門。鴻聲蓋以守身爲事親之實。立志爲願學之事。又豈陶母之望士行。范母之望孟博。可以自慰其母耶。鴻聲勉之。第求無負其母可也。

